

C. T. LOO & CO.  
41 EAST 57th STREET  
NEW YORK, N. Y.

NO. 552

HGT. 4 Vols.

LENG. \_\_\_\_\_

MADE IN CHINA











Digitized by the Internet Archive  
in 2016



過雲樓書畫記卷第五

元和顧氏

畫類五

文五峰芳園十五景圖卷

此卷流傳有二一藏吾樓一藏武林韓小亭泰華家今  
玉雨堂書畫記稱紙本八幅末署嘉靖辛酉春爲汝和  
祕翰寫與此盡同惟彼爲法梧門學士所藏每幅有草  
谿題識此若玉泓館薔薇幕漱玉泉春雨亭滌煩磯續  
立閣靜龕月榭潛蚪瑩心亭清暉樓垂雲峰雪舫石梁  
玉潤諸題名皆壽承所署而休承作絕句對題陳元素  
跋謂此十五景德承繪之壽承篆之休承詠之足稱三



絕彼冊皆無殆卽當時粉本故構局設色靡不相似取  
匙勘鑰用符合契相胖天然無可疑者又元素云今爲  
吾友青霞子所藏青霞畫韻詩格皆不肯作第二可謂  
此卷知己且白醉詩瘦花溪白香池諸勝不減輞川何  
不手爲題詠邀元歎輩作裴迪青霞子吾宗也與徐元  
歎雅故浪齋新舊詩中數見之汝和爲上海顧從義嘉  
靖中以善書徵授中書舍人隆慶初以修國史擢大理  
評事覃谿已詳言之厯三百年翰墨之緣皆屬一姓鄙  
宗韻事亦稱三絕矣

王吏部白描水仙長卷



圖繪寶鑑云王迪簡字庭吉號載隱越人善畫水仙特  
求其片紙當世希有偶得翦鑑亭舊藏王西室白描卷  
清鉛素靨冰鈿翠帶爲淩波仙子寫照不減襪羅微步  
時風韻也自題云近於友人處見王庭吉所作水仙花  
長卷行筆破墨與趙子固不同而尤多逸氣意甚愛之  
彷彿其筆意寫此今庭吉畫旣不可得有此替人不當  
在簪弟梅兄之列耶卷後王穉登跋外有福唐葉向高  
東海臧懋循二跋皆與吳越所見書畫錄合向高明史  
有傳懋循字晉叔長興人萬厯庚辰進士官南京國子  
監博士見明詩綜



王吏部水墨欣賞冊

墨寫花卉十二幅烘託點染盡態極妍自牡丹至山茶  
皆作五言絕句對題引首篆書欣賞二字末附手札一  
通署庚申臘月廿七日蓋嘉靖三十九年也明年七月  
二日袁褰題云西室弱冠時與余同結文社銳穎勤敏  
修業之暇喜握筆寫墨花宛有意趣按褰字尙之吳縣  
人長於詩喜繪花鳥有逸趣書法入米元章之室見堯  
峰文鈔袁氏六俊小傳尙之與西室俱游衡山之門故  
多能繪事後有曾倬跋及白門李氏珍藏印

文彥可米菴圖卷



張青父得米襄陽寶章待訪錄後榜曰米菴思翁爲作  
擘窠書彥可以界畫法爲之圖圖作銳石奇僵曲池迴  
瀆古杉如瓔珞偃松數株又如曲節蓋四周流水綠環  
門前度朶曲橋垂柳當關修篁俯澗牆匡以內立鶴守  
扁南嚮書堂兩楹一翁開卷踞几坐右室窗扇交風度  
架連雲有垂髻童檢書其中階下列哨壺枉矢若待散  
帙後樂賓慶馬者屋背山光城影與草岸葑田相映庸  
峭簡古直逼唐賢不知有宋元家數也款云米南宮楷  
書寶章待訪錄凡四千餘字相傳爲勝國趙文敏公物  
有趙氏子昂印在我明爲陸冢宰所有內兄青甫氏從



陸氏後人踪跡二十年餘始傾貲購歸遂自號米菴云  
云然則此段佳話當與錢伯廣得朱子手書二十詠以  
城南名齋陳仲醇得顏書朱巨川誥以寶顏名堂並傳  
千古矣後有李如一題趙宦光詩趙詩是文枏代錄宦  
光附見明史陸師道傳云女字卿子適趙宦光夫婦皆  
有聞於時著有說文長牋七卷著錄藝文志李名鶚  
字如一後以字行別字貫之江陰人見錢謙益所撰墓  
誌著有得月樓書目見李汝集戒菴漫筆跋

錢叔寶求志園圖卷

四部稿求志園記云吳城之東北隅爲友人張伯起園



伯起名鳳翼與弟燕翼獻翼並負才名吳語前有四皇  
後有三張是也是卷後有獻翼賦云喜幽居以傲物遂  
漂志於林樊取干將以名里傍辟疆而開軒則今之干  
將坊故與吾家辟疆園相鄰入門則古木環牆修篁夾  
路爲采芳徑由徑而東爲怡曠軒軒前編籬爲廣庭雜  
花糾錯其上折而西則紅簾盪漾肅然清靜爲風木堂  
堂左爲尙友齋圖書在几旁設胡牀右爲文魚館前後  
面池紫鴛白鵝兩兩戲水池上架石爲梁繞以朱闌爲  
□□橋循行西南角有古梅十餘株爲香雪廊至今按  
圖可索也圖爲嘉靖甲子夏四月錢穀所作後五年隆



慶戊辰春三月天弢居士王世貞爲之記當時文徵明書文魚館王穀祥篆求志園於其首皇甫汈李攀龍黃姬水黎民表等詩跋其尾皆明史有傳惟傅光宅徐鱗待考長樂梁芝林年丈所謂七人皆明代老宿詞字古雅者也余尤愛是圖樸屬微至雖界畫精整如脩內司營造法式而絕無絲豪匠氣丈以大家相推洵是真鑒因從敬叔同年得之

陸五湖溪山圖軸

子傳爲文門高足弟子明史稱徵明四絕不減趙孟頫而師道並傳之特其詩畫小楷世不多見此作水村人



家兩岸相望瓜皮艇子盪槳中流小舟泊野約外有漁  
垂竿獨釣坡下路絕架平橋通之有行旅策蹇持蓋將  
入秋林中木末亭臺樹杪樓閣登臨回望便見百丈山  
頭懸厓置屋飛泉界道迤左則峭峰如削石徑一綫出  
絕壁下護以曲闌兩山之間孤城斗大上罨白雲青靄  
雉堞隱隱可數行路難漁家樂尺幅中兼而有之真無  
聲詩矣上有子傳白題絕句及王西室彭孔嘉文壽承  
兄弟詩

陸包山綠牡丹圖軸

潑墨寫湖石旁出大花一朶色若嬌鴉豔於么鳳想見



下筆時真稼軒所謂翠毫夜溼天香露者自題及黃姬水王元美兄弟和詩謂創見王太史宅綠牡丹作此有弇州山人四部稿可證

王雅宜楞伽小隱圖卷

雅宜山人畫傳世絕少此作古樹繞屋修竹當門堂內一朱衣人踞几與黃衣老衲坐談門外松奏笙簧泉鳴琴筑不數鼓吹兩部前峰窄堵坡下琳宮梵宇隱見叢薄間夕陽一痕射相輪作紺碧色與四山紫翠相映帶絕境閼蘭若金天建旌幢斯之謂矣畫後自跋云楞伽之麓有堂三數楹堂前有竹數百挺竹間有泉余與諸



友所遊憩而藉以遺世者也掌之者僧方正遂謂之曰  
古泉上人既爲之圖又倡短歌二章諸友和之云爾余  
謂當時吾吳緇流若治平之聽松竹堂之無盡東禪之  
天璣馬禪之明祥天王之南洲寶幢之石窩昭慶之守  
山賴與衡山往還比諸參寥寶覺之徒今古泉之於雅  
宜亦復如之雖有高僧亦藉文士以傳耳

陳白陽墨花卷

白陽山人花卉王奉常所謂不經意乃自佳者此作墨  
花十二始風蘭終山茶中間瘦石一卷幽篁半枝芳綴  
秋花皆零星小朵有寒蝶抱香而至想見青粉牆低淒



畫五  
六  
豔盪魄末署嘉靖辛丑臘月望後偶泛鵝湖晴光可鑒  
客具筆研漫寫此卷以紀勝游知當時九龍山前二泉  
亭外一片春光飛落歆豪淡墨間矣有朱臥菴汪闓原  
諸印

張元春安氏西林圖冊

王弇州稱元春自荆關以至倪黃無所不有而能自成  
一家少師錢穀有出藍之譽此寫山林幽秀水木明瑟  
循題構局異境迭開是園林山水而得界畫遺意者款  
署萬厯庚辰爲茂卿先生寫西林三十二景時蓋神宗  
八年也茂卿爲無錫安紹芳所居膠山下西林山水林



樹最美先生著書其間有青萍芳景二京諸集其子璜  
彙而刻之統以西林名篇見魏叔子西林集序圖本三  
十二景已佚其半今以弇州安氏西林記互相參考其  
兩存者八景風弦障遯谷上島空香閣素波亭息磯椒  
庭爽臺是也圖有而記無者八景花津石道榮木軒沃  
山鶴徑層磐藻渚雪舫是也記有而圖無者十二景蘭  
巖晨光塢纖纖泉鏡潭島嶼中州蕭閣景榭一葦渡夕  
霽亭醉石虛籟堂是也合計得二十八景尙有四景則  
并其名而佚之蓋距今且三百年矣吾益思蘭館莢泝  
輞川摩詰之居翠庭錦淙嵩山盧鴻之宅何以山姿水



態婉變在目也

周公瑕墨蘭卷

文門諸子皆喜寫蘭而各具面目此卷墨寫坡上蘭葉  
十種間以棘草尤極古拙春蚓秋蛇不足盡其妙也首  
篆楚江秋思四字爲癸巳九月旣望書跋云閩中朱肅  
齋於文苑事頗識趣亦有觀場之癖持卷命作蘭又命  
余自題識云云爲是歲十月四日書所爲兩截句亦附  
於後署萬厯甲午冬日八十一翁周天球作於鑒止堂  
蓋公瑕八十後筆也晚香堂集敘姚叔信詩云周公瑕  
八十而後無聞度生平著作非并入筆冢便作太山無



字碑矣則公瑕晚年所作明季已難得如此況後三百  
年耶又本幅題詠十家王稚登錢允治外如強存仁金  
陵人寫蘭效周公瑕姚俊吳中人山水疏秀用筆亦老  
見畫史會要惟張夢錫字雲生當乙酉六月我大清  
兵入浙與董志甯陸宇鼎華夏王家勤毛聚奎徧詣同  
里薦紳勸之起兵有六狂生之目後卒將五百人死江  
上見南疆繹史列傳撫遺是今之田橫也卷亦因此增  
重矣

明賢合寫藥艸山房圖卷

席門半開斜臨石橋其中古樹繞籬修篁夾徑入門揖



讓間已有人並立竹所一小奚捧書從復前行爲草堂  
壁琴爐香方席地坐談其西窗下則難燭引觴三人據  
案哦詩屋後蒼松翠篠與階前奇礪古石坡陀列樹相  
掩映又於寒蔌間見芳畦數棧雜菰靈苗異卉莫可名  
狀此文休承錢叔寶朱子朗合寫蔡叔品藥艸山房圖  
也圖据休承題識迺紀嘉靖庚子十月十九日山房之  
會孔嘉忽吟畫史爭圖藥圃花山人倒寫岩門樹八人  
者欲爲聯句不成因各分韻賦詩壽承得齊字先成陸  
紫芝第二休承第三孔嘉第四沈禹文得中字第五周  
公瑕得齋字第六石民望第七叔寶第八子朗殿成各



書於後公瑕又賦詩書之時漏下二十刻矣諸子皆出  
文門同負時譽追北郭詩人之社媿西江宗派之圖美  
盡東南可於賓主徵之陳仲醇跋謂皆吳下絕代人此  
中著半箇屠兒沾不得想見肅廟時太平風物之盛可  
與西園雅集並傳觀蒼葢菴主推許至此可知其名重  
一時故啟禎間摹本極多李君實跋云此卷余凡三見  
贗本面目位置非不一一都似而神不偕來覩此正如  
漢元見王嬙於遣賜呼韓時悔從前按籍之誤真是鑒  
家自道甘苦語因大觀錄不載題跋故詳記之

項子京雙樹樓圖軸



雙樹間一僧臨流抱膝危坐坡下水色浮空山光下暈  
白石齒齒漱齧流泉蘆荻蕭蕭颯戰風力四顧清寂殆  
有縣厓撒手觀河陂面之感下方署皋謨鑒定及項子  
京寫於雙樹樓八字上書此楮迺予在嘉靖癸丑歲所  
作抵今萬厯甲申三十有二年矣疇昔偕雙樹樓關主  
鹵丘爲方外交日過笑晤時一染翰戲游三昧向已亡  
去不知所之奚意柏庭上人以余爲乃法祖世契檢出  
相觀不覺悵然云云蓋予京於神宗十二年爲柏庭重  
題者容臺集太學墨林項君墓誌銘云晚年意在禪悅  
與野衲游正其時也



徐天池墨花卷

陳簡齋云意足不求顏色似東坡云作畫必此畫見與  
兒童鄰解此乃可與論青藤之畫此卷前後有沈春澤  
兩公秋雪堂書畫印諸鈐記乃虞山沈氏舊藏春澤字  
兩若喜爲詩疎疎清出亦善畫蘭竹見懷舊集又浪齋  
新舊詩有沈兩若見示徐文長畫雜花卷云徐生畫花  
備四時惟須佳墨與臙脂又云寒幹疏梅開遠天敗荷  
枯荻淡多烟高情豈必求形似蜜蜂胡蝶生其間卽題  
此也卷中自牡丹轉官毬至水仙鉤勒竹爲花十六種  
但用破墨臙脂信手塗抹妙在無一筆似處然其妙卻



又在無一筆不相似才足稱天仙化人之筆花間各題  
絕句文長嘗言吾書第一詩二文三畫四余謂就畫而  
論駿快如天馬行空遒勁如怒猊抉石活潑如羣鴻戲  
海超逸如孤鶴橫江自當首屈一指書法雖神似元章  
猶不免壓居第二自評云云政如李東陽戲張汝弼語  
乃英雄欺人耳後幅有宋獻獻孺宋之繩其武諸印別  
紙有獻五跋及王武跋獻孺官中舍見容臺集其武官  
翰林見堯峰文鈔又堯峰忘菴王先生傳云王先生武  
字勤中明太傅文恪公六世孫卽世所稱忘菴老人也  
董文敏書畫冊



冊書畫各六幅書仿蘇體畫法董巨而於房山尤爲酷  
似自題有云米元章父子墨戲皆自北苑得路勝國時  
高彥敬尙書益盡其法彥敬爲吾松流寓余曾祖母高  
之孫也不止翰墨眷屬等語與容臺集稱高彥敬尙書  
載吾松上海志元末避兵子孫世居海上余曾祖母則  
尙書之雲孫女也相合因知黃鶴爲松雪外生香光亦  
房山所自出采芝引根酌醴討源古人尺縑寸素所流  
傳非得大家法乳烏稱嫡派也哉

董香光書畫袖珍冊

香光手書論畫六則其五見畫禪室隨筆惟朝起看雲



氣變幻一則畫訣畫源皆無之然亦見於容臺集畫旨  
中矣附以山水六幅氣韻生動得於自然當與論畫同  
時所作据先生署款戊辰春三月時在木瀆村居對新  
綠試筆是年爲思陵紀元木瀆村居卽詩集所謂瀆川  
山莊蓋公晚年筆也末有錢梅溪王銑夫題記爲海上  
巨室所藏亂後零替始出求售余與三子承見而心醉  
亟以重直購歸過雲樓中華亭名跡得此最後足以壓  
多寶船矣

董香光山水九幀冊

据高江村跋知文敏畫此與其子者故未書款其冢孫



携至京師沈文恪復跋之不知何以流落燕市周茂卿  
得而贈余則知是冊爲竹牘珍祕也思翁子名祖源有  
示祖源論書語三千八百餘言見張翀淞南識小錄冢  
孫者据晚香堂集題董宗伯手書家告跋有云冢孫貢  
士庭請礪石而傳之蓋卽輯容臺集之冢孫庭耳顧容  
臺集亦有寫此付孫庭收貯之語知其晚歲得意之作  
多與藏度冀後人於北苑宗風緜延勿替庶不沒祖庭  
貽厥之心而已雖余於香光無能爲役范硯之傳則頗  
有同情他日吾諸孫中有約之其人者乎老懷足慰矣  
展玩是冊彌復矜寵



董文敏贈何宗伯詩書畫軸

文敏此幅爲贈何吾騶之作以墨筆寫山水精楷款題  
余再入承明與粵東何尙書象岡同署旣余不任朝謁  
思歸故山以語同官鮮從臾者宗伯獨以勇退爲厚愛  
每宣言其病狀余深德之寫此圖留別并係以詩按明  
史本傳云崇禎四年起故官掌詹事府事居三年屢疏  
乞休詔加太子太保致仕知文敏以四年起居再三年  
致仕當在崇禎六年詩後署崇禎五年歲在壬申嘉平  
廿九日則是時得請至六年出都與史合矣又考何吾  
騶明史附王應熊傳但云香山人萬厯四十七年進士



由庶吉士歷官少詹事知首言與粵東何尙書象岡同  
署謂同官詹事則象岡卽吾騶明甚吾騶喜書畫故李  
日華墨君題語有題孔孫寫竹爲何象岡太史及戊辰  
夏京邸題孔孫竹石爲何太史象岡二絕戊辰爲崇禎  
元年吾騶尙官翰林且可据補史闕云

董香光嵐容川色軸

香光畫趨步董巨而此兼元季四大家故於元氣渾淪  
之中仍寓簡淡高雅之意自足矜尙讀署款知爲戊辰  
歲追憶梁谿吳黃門家沈啟南嵐容川色圖而作明年  
己巳以贈汪元霖者容臺集有云汪太學元霖於穆溟



爲族弟卽其人也石田舊圖亦水墨大幅自云從劉完  
菴所臨損益有跋見都穆鐵網珊瑚

李洵盦谿山秋意圖卷

淺設色寫長烟四斂林屋沈寥野店山橋而外惟見風  
帆沙鳥遠向碧空飄然知其爲秋也款署丁卯八月巖  
桂已香無與同勲者偶簡此卷輒作溪山秋意圖按長  
蘅又爲吳生作谿山秋靄圖牧齋題云吳生遇盜事亦  
奇襍被囊琴暮雨時向盜乞畫真癡絕盜亦欣然還擲  
之末云憑君更屬松圓老爲寫江干乞畫圖青瑣舊物  
綠林豪客皆有可傳亦畫禪中一段公案也丁卯爲天



啟末年以松圓偈菴集長蘅沒於崇禎己巳計之距卒時厯二霜矣

李長蘅書畫冊

慎娛居士書畫引首自書山林逸興四字已下爲山水林木者十二幀爲眞行草書幀如畫作跋記之時天啟乙丑歲也畫皆水墨間用設色王敬哉所謂蒼寒樸秀者所書皆已詩詩中龔仲和汪子將張魯生宋比玉葛寶甫汪伯昭沈公路一濂上人茂初伯氏均見嘉定四先生集印持爲餘杭嚴調御有廢翁詩稿後十五年爲崇禎己卯程孟陽爲跋於後距居士歿十年矣有云此



冊故仲和所藏乃其問疾時留以爲訣者并及杭州鄒  
孟陽孟陽卽居士爲作六浮閣圖者名亦見集中故覃  
谿旣臨何義門跋兩孟陽語復云招兩孟陽村酒酤及  
六浮千古說鄒程也

楊吉州贈無功山水卷

龍友與馬瑤草在明季俱負詩畫名顧瑤草畫後世至  
改名爲妓女馮玉瑛作而龍友以大節凜然間遇蘭石  
小幅亦爭寶之此卷寫寒山古木白雲在空絕壁離地  
甚或峰迴路轉懸崖置屋水落石出添泉長谿於山窮  
水盡之時見慘淡經營之致自是不數觀者款署丙辰



二月爲無功社兄畫接裝僧智舷詩九首亦署丙辰八月書似無功先生按祝世祿字延之號無功鄱陽人由進士萬厯乙未考選爲南科給事中見明儒學案又漳浦集有賦贈陳無功二章無功嘗得石經遂名其居曰石經草堂見六研齋二筆据此皆明季耆碩未知卷當屬誰智舷字葦如號秋潭秀水金明寺僧有黃葉菴詩見明詩綜紫桃軒雜綴稱黃葉頭陀舷公新柳句云夜雨已禁愁不得春風只管舞教顛卽其人也

楊龍友山水軸

客臺集題跋稱龍友所作台蕩圖出入巨然惠崇之間



而此作爲崇禎丙子元旦畫於雲間竹居者溪山醞藉  
林木駘蕩又神似子久浮嵐暖翠筆意故思翁書其上  
云別一山川眼更明幽居端的稱高情從來老筆荆關  
意施粉施朱笑後生蓋以子久相況妮古錄云余嘗見  
黃子久山水幀有句曲張伯雨題云由來老筆荆關輩  
施粉施朱笑後生閔元衢跋外史集亦載之思翁正用  
此二語也

邵僧彌小可觀冊

引首瓜疇以隸書署小可觀三字蓋崇禎丁丑爲季遠  
作於蟄齋也雜放北苑海嶽父子令穰元鎮叔明子華



啟南凡八家妙得神似尾署丁丑六月幾望季遠社兄  
過訪法水之清蔭堂寢食戲謔者累日夕得暇便商筆  
墨煙雲所得塵可成帙又云元鎮贈龍門僧獨有人余  
此幀擬之斯說不然殆猶沿冬宰之誤也客臺集題跋  
云雲林生平不畫人物惟龍門僧一幅有之攷鐵網珊  
瑚有雲林逸人爲復菴長老寫龍門獨步圖僧爲斷江  
恩公所謂恩公昔住天平日林下相逢壞色袍行到龍  
門無腳力右肩偏袒喫櫻桃是也此幀寫空亭雙樹一  
人于山徑間與六硯齋二筆所記一松軒仰一櫟傍  
之一僧行其下若合符節如見雲林遺範云抑余更讀



郁逢慶書畫題跋記載曹函光跋秋林野興圖云倪畫  
人物古雅世謂祇龍門一幅畫人殆虛語固已斥其誤  
矣冊後有高南阜及何燮叟詩高稱述懷代柬蓋上審  
翁州使君者下復有詩稱檢得邵彌遠山水冊上獻題  
詩識意二首下署乾隆戊辰夏六月苦雨絕糧六十六  
歲痺民高鳳翰左手呈本子貞晚年病攣其書純以拙  
趣勝不謂先有西園儷之審翁宋姓於乾隆五年之官  
膠州見西園賀審翁孫湯餅詩墨蹟山東通志於乾隆  
五年後未經續修審翁名籍竟無由知而僧彌又字彌  
遠得聞所未聞



張爾唯詩畫卷

岫屏起伏瀑練奔注員淵環之倒鑒山影約菴爲南明  
社翁作也畫後別紙界朱闌書詩六首亦次南明韻約  
菴爲畫中九友之一嘗爲蘇州知府而吾吳流傳畫本  
絕少余搜羅數十年僅得兩卷一贈南明一壽沈朗倩  
者疎林老屋門外峰巒繚亘谿澗回環頗饒山居之趣  
後書七律兩首往歲從吳子漁明經得之以筆致稍麤  
不逮此卷之精密未及著錄嘗鼎一臠已爲知味政不  
必過屠門而大嚼也南明姓李名天燦見吳偉業復社  
紀事又浪齋新舊詩有云望齊門外陸墓名區更革以



來詩客相依方南明以四律見投僅答其一自注方名  
夏河南人則同時有兩南明矣然以居易堂集題畫芝  
贈方南明題竹石贈方南明六十言之似方南明流寓  
吾吳多與賢宿往還故約菴爲作此畫云

程孟陽臨宋人山水卷

設色作松陰一亭如路旁埃子過此則石梁跨澗谿閣  
背山有小舟繫纜其下遙見隔江數帆高出綠楊頂上  
清麗秀潤爲松圓偈道人僅見之作題云駙馬都尉王  
晉卿有此幅仇實父臨成副本直欲奪藍余以意爲之  
不欲向晉卿喉下討氣也觀此知明季晉卿畫已不易



見況在今日得見松圓此卷臨濟兒孫究傳祖師衣鉢  
亦足矜已後有李長蘅跋云與松圓同客秦淮出此見  
贈今卷首題譚猶檀園手筆也

程松圓山水十景冊

冊爲潤洲戴植聽鸛館舊藏凡水墨八幀曰松谿話別  
寒山孤艇策蹇尋詩春江釣艇山齋讀易雪浪征帆疎  
林遠山灞橋覓句款題庚辰陽月畫於松圓閣以列朝  
詩集小傳崇禎癸未十二月孟陽卒年七十有九考之  
庚辰爲七十六歲觀其寥寥數筆淡如溫伯雪子潔如  
姑射神人豈餐腥啄腐者所能夢見宜其雅自矜重如



讀畫錄所云也

卞潤甫壽煙客冊

明畫錄云卞文瑜字潤甫長洲人善山水行筆流暢位置殊有思致此寫青林紅樹白石清泉水口磬頭具見遺意立局之法或用墨筆作野店山橋荒村老屋亦極淡雅雋永中惟首幅樹石千年古岩百丈流及末幅辛卯中秋寫祝烟翁先生六十初度有題署與畫合裝者爲讀徹僧詩明詩綜云讀徹字蒼雪呈貢人居蘇州楞伽之中峰詩有小啟題奉賀烟翁老居士六秩初度詩十章忝埒畫葉之尾題爲太常酒金谷園柴桑逕摩



詰畫諸律詩格清超妙在無一點酸餽氣聞蒼雪與扈  
芷匡雲結夏東余白石山房嘗打松子爲爨陳仲醇作  
歌紀之見晚香堂集今觀是冊信不食人間烟火矣

吳梅村山水軸

春雨初甦望鰲樹中山橋碧陰溪館綠滿踏枝乾鵲嘆  
惜與殘滴相答和時見最高峰上紅牆一角微出松際  
此梅村水墨小景自云新霽後戲筆於梅花菴中者也  
王圓照謂此幀乃司成公遊戲三昧如不經意然元氣  
靈通參乎造化卽苦思歲月不能到此真知言哉

吳祭酒南湖春雨圖軸



梅村集鴛湖感舊云予曾過吳來之竹亭湖墅出家樂  
張飲後來之以事見法重游感賦有風流頓盡溪山改  
富貴何常簫管哀之句此南湖春雨圖所由作也圖舊  
載吳越所見書畫錄平波縈恨遙山赴愁樓閣悽迷掩  
映蕙簟古木間殆追寫昌時故居者上方自書鴛湖曲  
以校集本互有同異如七貴三公何足數作七貴五侯  
何足數畫閣偷窺老兵怒作畫閣猶存老兵坐人生苦  
樂皆陳迹年去年來堪痛惜作人生快樂終安極年去  
年來增歎息末署壬辰三月下泮補此圖是歲爲順治  
八年距昌時籍沒二十年矣奉誠園中已非馬氏西州



門外又過羊曇對此茫茫百端交集吾知烟雨樓下不復放船遂使小長蘆釣師扣舷而唱櫂歌也

陳老蓮鍾馗象軸

終葵氏見於左傳漢時椎謂之終葵見於鄭君考工記注許君說文木部無與於効鬼也其用以辟邪者則自補筆談稱吳道子畫鍾馗始章侯取法道子用淡設色寫鍾馗烏帽簪花玄衣龍文玉帶囊鞬右持劍左執銅爵菹蒲其中仄行卻立髮髟髟鬚鬣鬣矣款署乙酉端陽陳洪綬爲柳塘王盟兄畫於青藤書屋勸蒲觴也按青藤書屋徐文長讀書處藤太如斗徐白稱青藤道人



後爲陳章侯宅陳歿青藤爲風雷所壞見施愚山集又  
集有書陳章侯白描羅漢後稱其徒陸山子薪云師作  
人物設色綴染薪具能從事惟振筆白描無粉本自頂  
至踵衣摺盤旋常數丈一數鉤成不稍停屬有游鷗獨  
運乘風萬里之勢它人莫措手方之顧虎頭李龍眠又  
一變者嘗服其活畫老蓮手段此幅鉤勒圓轉不讓白  
描且仙袂飄飄具有吳帶當風之致願當世瓣香奉之  
當勝於補朱繇爲道立也

陳章侯胡華鬢合冊

此老蓮鼎革後筆也毛西河報周櫟園書謂甲申後更



其名悔遲故稱老遲此冊又有勿遲一印爲西河所未  
言墨筆作山水竹石間傳赭綠蒼秀精緻自關蹊徑不  
盡宋法也姬人胡淨鬢亦畫墨梅四幀配之則辯華交  
榦居然若水矣因憶曝書亭集崔子忠陳洪綬合傳云  
予友孫如銓常師事子忠道子忠二女皆善畫而洪綬  
妾胡淨鬢亦能畫花草初以爲略解調鉛殺粉耳不意  
能譜綠萼華喜神如此卻羨老蓮幾生修到也署款華  
鬢淨德字極秀媚鈐以禾亭夷君小寶諸印則頻伽跋  
所謂仙人十障名居其一亦可以廣見聞噫白雲竹石  
足侍癡翁陀娜水仙合歸聖僕小妻有是固女紅志之



餘聞亦小名錄之史料已

陳小蓮山水人物冊

老蓮之有無名猶白陽之有沱江也潁川一門作述相望殆是畫苑佳話冊都八葉寫山水花鳥各三人物走獸各一款署小遲倣元摹宋學若水筆寫居案法實則皴擦鉤勒純是宋賢嫡派特元時家數亦無所不能耳名父之子所過人者在此

八大山人二十二幅冊

改革之際賢士君子相率飛遯往往皈心竺乾寄迹苾芻以遂其志節閒或粗筆淡瀋寫其伊鬱悲涼之況不



得以尋常繩尺拘之也山人此冊合題跋二十二幀作山水者二餘皆寫花果魚鳥水墨設色信筆點染意到而已然神氣溢出姿態橫生可謂奇而法醇而肆矣署款有類鐘鼎如<sub>鍾</sub>類章艸如<sub>今</sub>者諦視之上是三  
月九日乃思陵殉國諱日下是个相如吃四字蓋山人爲朱奄字雪個故石城府王孫固見於畫徵錄也引首署安晚二字云甲戌夏至退翁先生屬書自跋謂始於是夏五月六日成於六月廿日而冊中有甲戌重陽及壬子一陽之月諸款先後參差甚或相距九年當是追題者退翁姓李氏名洪儲字繼起揚之興化人早歲出



家師事三峰爲高弟吳中高士徐枋歎爲真以忠孝作  
佛事者見鮎埼亭集南嶽退翁和尚第二碑蓋卽居易  
堂集退翁哀辭所謂滄桑以來每臨是諱必素服焚香  
北面揮涕二十八年直如一日等事所賴此冊長存俾  
後世作明遺民錄或國朝高僧傳觀也

石谿達磨面壁圖卷

絕壁俯澗枯松倒挂藤蘿冑之一胡僧擁紅氍毹坐石  
上前書清風匝地四字後題想他無地賣心肝一偈款  
署電住殘禿爲石隱禪契跋者九家惟青溪道人爲程  
正揆字端伯孝感人崇禎辛未進士龔賢字半千家崑



山流寓金陵有香草堂集並見國朝畫徵錄又錄稱殘  
道者筆墨高古蓋從蒲團上得來若此幀之參透祖師  
禪未知幾費定裏工夫也憶吾友許信臣乃釗云曩余  
視學中州由洛陽赴汝州經少林寺於後殿西壁有巨  
石直立高丈許數十步外忽見有頭陀被褐側坐目光  
炯炯外視者寺僧遙指曰此卽面壁時留遺影像也近  
視摩挲則牕石不復成文佛祖幻迹隨處示現不可思  
議如是余按施愚山學餘文集游少林寺記亦云初祖  
菴在西北二里龕達磨影石高三尺廣半之膚理眉髯  
如生世稱達磨面壁九年時精神所徹也故道園學古



錄達磨像贊云萬里東來言不契九年壁底影爲雙上  
言不立文字教下言影石此西來後一縷心光不意復  
從殘道者筆底傳出通靈畫耶彈指禪耶吾謂卽此是  
佛願大眾合十頂禮之

陳涉江浮海圖卷

大江中洪波巨浪軒然而起七人涉之各繫以贊乘石  
者云用爾作舟石亦可浮乘螺者云螺舟駛今天則邇  
兮乘葦者云葦可航彼懦乃不能厯康莊乘鞋者云吾  
鞋酒鄉何茫茫誰能窺其中之藏乘蛤者云天河可竭  
紫蛤山裂讀古不輟乘羽扇者云羽扇一規也挺而吹



思哀哉乘槎者云石支機槎當歸江伯蘭楊龍石程序  
伯張叔未皆有詩惟張秋水跋稱涉江少著名復社崇  
禎十三年成進士擢河南道御史募苗兵於黔南甫出  
都而國變託黃冠以老與無聲詩史云陳丹衷字孚昭  
金陵人崇禎庚辰成進士廷對稱旨卽授御史時上欲  
振揚威武奉簡書招苗兵於黔粵甫持節而逢國變所  
言皆合跋又稱所著有蔗渣集探原離騷時取逕長吉  
善繪事此祖其魂遠游賦意而輔以崑崙流沙駟蚪駕  
鷺之旨不知與秋粕二百篇何如與讀畫錄云陳孚昭  
侍御一字涉江著作甚多皆零星未及鈔訂同里錢季



水藏之又秋柏五七言四百首亦未刻所言亦合此當  
是入國朝後筆故比於作者七人之數以自傳至末  
署八月四日雲客攫去跋謂是張怡鼎革後入攝山白  
雲觀白號白雲道者時往來於城南之松風閣以望宮  
闕疑卽其人是雲客卽張瑤星然瑤星號白雲老人未  
聞稱雲客也考當時字雲客者高兆見閩小紀及詩持  
彭瓏見復社紀事似較可信惜不能起秋水而語之  
清湘老人花果冊

此冊皖人於劫灰中拾得計爲花七爲果二墨筆寫生  
高麗紙上每幅白題數語款云素亭先生以紙寄余大



本堂久旱秋雨一夜大作辰起快樂無極戲作花果十二冊今校其存佚譬諸山爲九仞屋欠三瓦造物忌完於此悟消息盈虛之理因屬同歲生何子貞書首藏之庚申人日殘雪滯寒擁鑪坐對頗思向苦瓜和尚乞梅花一枝分芋頭半箇也

清湘老人黃牡丹圖軸

十月陽和快活當清湘筆底放花王眞州已作河陽郡不有姚黃浩態狂下書抱甕主人以黃牡丹詩出紙命清湘陳人寫畫圖成漫書於牡丹花下用博一笑畫作牡丹一株上綴兩花一全開一半開鵝帕分香鶯衣染

色覺金帶圍未足稱花九錫也上方書黃牡丹詩十律  
末云崇禎初禩天下文風丕暢大江長淮合閩越吳楚  
之彥士鄭超宗先生邦上影園爲都會延接名流才士  
一時納交恐後西園中黃牡丹大開徵天下之詩先生  
有二札與如皋冒辟疆生其一曰黃牡丹書俱已全彙  
糊名易書卽求尊札遣疾足至虞山懇牧齋先生定一  
等次得狀元者弟已精工製金杯一對內鐫黃牡丹賞  
最待之羣公咸集聽命望吾兄加意由貴邑至常熟一  
日可往返也其二云得牧齋回札知賞心在美周卽以  
杯贈之美周將渡江訪虞山執弟子禮此亦千古快事



也按牧齋初學集有詩云廣陵鄭超宗圃中忽放黃牡  
丹一枝羣賢題詠爛然聊復效顰遂得四首蓋牧齋以  
黨魁執騷壇牛耳旣爲考第復與和詩金粉風流傳徧  
大江南北遂使蓮鬢閣十詠得與后土瓊花唐昌玉蕊  
名篇麗什照耀今古雖老衲蒲團盡空色相亦爲圖詠  
流傳人間豈非香國之美談花史之佳話與鄭超宗名  
元勳揚州府江都人黎美周名遂球廣東廣州府人俱  
見復社姓氏錄至美周忠烈捐軀贛州賦詩有鬼伯舐  
復嫌心苦血不甜之句則尤足使影園靈花大長聲價  
絳老雖抗顏爲師媿之多已

藥地師書畫禪冊

余自鄂城得无可大師書東坡詩九番畫山水奇石十  
一番書宗晉賢畫法宋人款署愚者案南疆繹史摭遺  
云無可桐城人姓方氏自署其號曰浮山愚者蓋披緇  
後無常名最後稱爲愚者其山水六幀有自題云屏山  
引退之爲盧大使舞端叔嗤東坡將錯就錯毋乃近之  
愚者曰秃筆自乘其勢耳解衣盤礴裸當觀其意又云  
有時雷碾而敦龐若璞有時娟秀而寒芒刺人毫毛鍼  
鋒具何思力而能若是乎愚者曰明牕睡足起來且得  
一笑又云削鐵師關仝蟹鉗師浩然猶是牝牡驪黃相



馬耳別有蕭條難寫之致隨分露一毫頭因作洛下聲  
曰不亦說乎施愚山集无可大師六十序所謂片語單  
辭無非大道也又有浮山吟云浮山一片雲飛落蒼梧  
野白注藥公家浮山迺知冊中鈐浮山智及愚者小印  
其自署愚者仍從未出家時名以智取義樂操土風不  
忘舊也

丁南羽山水冊

無聲詩史稱南羽畫大士羅漢功力靚深神彩煥發山  
水谿壑深秀追蹤古人李龍眠趙松雪不能遠過蓋力  
復北宗之學者此冊十幅皆用墨筆細皴作疊餅坡網

中水夾葉樹界畫亭臺人物細不及寸而衣褶古雅舉  
動若生款署辛亥長至前一日寫於虎丘僧舍萬麻三  
十九年也前後王沆十二跋有丁南羽在前明供奉畫  
苑一時名爲繪師國手或設色或運墨悉以淡濃之筆  
乾澀之神層迭而成此爲昔年 成廟賜先文恪公尤  
殷寶重云云文恪名鼎字定九道光朝嘗劾穆彰阿而  
薦林文忠以尸諫者其子沆惑於邪說卒寢其事天下  
憾之据沆所言冊係 內廷珍秘復出人間什襲度藏  
得不爲吾樓幸耶又余藏南羽白描十六阿羅漢海會  
妙相卷墨細於絲筆勁如鐵龍虎麟鹿導駕雍容餅拂



扇仗執御閑雅以及鬼物偵訶神靈候迓觀音瓔珞莊  
嚴坐古洞蓮花上旁列經卷韋陀甲冑倚杵而侍論其  
筆妙不減龍眠惜余不能如王英伯放貝葉語爲之作  
記耳通幅無款紙角有雲鵬之印朱文鈐記靜心居詩  
話謂南羽寫神王羅漢骨氣奇偉不減大小尉遲殆非  
虛語宜思翁以毫生館印章贈之

魏子一仿宋元八家冊

自元賢論畫有士氣之說所重者曰意境曰氣韻凡兩  
宋相傳金碧界畫及設色之近於院畫者槩以工匠斥  
之而古法亦蕩然無存二百年後有唐子畏項孔彰丁

南羽者出始稍稍規模宋賢以復古爲任而魏子一集其大成然已在明季矣此冊小幅仿河陽令穰元章李唐次以松雪黃鶴雲林大癡一一精楷對題其略曰畫家務有主山而枝節附之是以堪輿爲畫者也此作岡嶺正側迭爲主客風格高尚矣又曰著墨欲入紙裏著色欲出紙外積墨多不患其不入也色稍潤則滲矣滲則失神染則失痕語云皮皴不欲丹青作畫肉也然豈輕施薄設之謂哉又曰凡畫路者水以沙分山繇石辨若陵寢壇廟之地松柏列植則望樹頂而知路矣前人未之得也又曰有就一木一石而自爲澹遠者本近而



支遠矣本濃而支澹矣用正鋒吮墨爲之全不許著焦  
破一點皆自抒心得獨標真諦如太史公談六家要旨  
精當絕倫而自題檢曰古意難復蓋用趙文敏語子一  
志在復古故與文敏心源息息相通又其筆端有宋賢  
之穠麗而去其滯有元賢之蒼雅而去其率精鍊古厚  
足爲勝國末造大家甲申之變以後死四十日遂多誹  
議顧鮎鯨亭集謂子一致蠟書夏峰謀殺賊而欲以唐  
通爲應青箱堂集讀子一忠孝實記書後亦有先約容  
城孝廉孫奇逢輩聯絡義勇赴難之語則其遲回觀望  
究非欲艸間偷活也

姜學在高山流水軸

直幅寫空亭樹石谿口小橋一彎上有飛瀑歎薄出兩  
厓間右方篆高山流水字題云愛此居鄰近招尋每論  
詩山頭與山下老矣歲寒時余避跡虎丘灑埽先祠二  
十餘年薇洲內弟適移居山下風雨晦明每相過從老  
景甚懽今日以紙索畫漫爲寫此兼形之詩鶴澗隱人  
萊陽姜實節時年五十九乙酉又云後三年戊子一詩  
附書逝水流光兩髯霜爾爲阿舅我爲郎家常數盡平  
生事四十年中幾斷腸諫艸樓下是日壁懸倪高士雅  
宜山圖并記按王樑繭亭續畫錄載學在山水亦云其



內弟所藏幅端篆書高山流水四字惟白跋云此畫與  
大癡叔明雲林三家有微似處而是幀書畫皆放嬾瓚  
爲異知學在爲妻弟所作多示琴趣殆自命牙子而以  
中旗目之若謂世無同調誰更知音區區趨步元賢祇  
堪舉似薇洲耳故指所藏雅宜山圖以見意圖載妮古  
錄所謂靈巖對植雅宜山穹林巨石臨蒼灣若翁遁迹  
在其麓有子讀書長閉關是也

垢道人望裏氤氲圖軸

秃筆破墨寫亂峰重叠老屋數間門前古樹野橋荒寒  
可掬隔岸松下背山起樓面水層軒一翁風帽倚闌視

洞口歸雲頗極枯淡之趣上題四律有望裡半氤氲林  
疏盡白雲之句署款甲子八月蓋天啟四年作也然則  
穆倩在天啟時筆墨已極蒼古湛菴未定稿稱其朴貌  
厚衷須眉皓素醉後瀾翻縱論西京天寶間遺事多人  
所不聞志趣若此宜有學集贈序以異人稱之

垢道人秋巖聳翠圖卷

江東布衣以枯筆寫山水入逸品此卷純用渴筆乾皴  
間以焦墨點椒及寫遠山而深林邃壑絕澗危亭氣格  
都奇色香俱古石中之綳瘦透也分書自署秋巖聳翠  
圖并題七律二首以贈查梅壑按國朝畫徵錄稱梅



壑性疏嬾嗜臥或日晡而起畏接賓客是有託而逃者  
又稱布衣品行端慤敦崇氣節從漳浦黃公道周清江  
楊公廷麟游所談論皆國家急要名公卿多折節交之  
則二人皆明遺民也河山已改城郭都非回首滄桑當  
於此畫寓感矣

顧子怡墨蘭卷

墨寫蘭石間以墨竹鉤勒竹款署崇禎癸未本幅題詩  
十八家有云正則篇中第一芳幽人清興在瀟湘庭前  
紙上盈盈處知是花香是墨香金正希先生筆也考南  
疆繹史本傳云崇禎十六年冬廷臣交薦起爲修撰會

母喪未赴南渡遷左僉都御史不出作詩當在此時其餘題隔水綾上二家別紙題跋二十家若冷士峻查士標唐宇肩皆勝國遺老足以企蹤汐社嗣響谷音子怡是卷賴以不朽矣子怡名紹和潤州人故是卷流傳金陵京口間引首書楚畹清標者筮重光署檢者湯貽汾也

龔野遺山水十二幅冊

柴丈人與樊圻高岑等爲金陵八家妙在寓虛於實用簡於繁置諸宋賢中許爲董巨別子充其所至實能自立宗派惜傳世絕少難爲王丐耳此十二冊自跋謂長



夏山中無事晨起移小几坐竹中隨畫隨題日得一幅  
以爲清課非應他人見命故濃淡多寡得以自由蓋半  
畝園消夏之作所寫古洞石瘦柴門雪肥湖心結樓紅  
版通路潮頭沒屋綠楊見頂無聲詩裏白爾情韻雙絕  
余尤熹葉脫見山林深藏寺兩幀以爲不讓李成寒林  
李山風雪松杉也況更有每幅對題耶至詩中旅堂先  
生性愛水一日城中不可居自注旅堂武林胡介吾友  
也考介字彥遠有旅堂詩集見明詩綜又讀畫錄云彥  
遠胡介與半千爲世外交隱武林一畝田櫟園過半畝  
園贈詩云彥遠今高士武林一畝田約君爲隱侶交我

舊忘年蓋亦明遺民矣

王孟津書畫合璧卷

水墨寫蘭竹菊石間以靈芝棘刺款云王鐸癸未寫卷  
首隔水綾上又題予久不作畫偶寫爲嘉墨故耳畫後  
別紙臨閣帖七種款云弘光龍飛之年臘月雪霽呵凍  
書於文淵閣政南都再造召入內閣時也按國朝畫  
徵錄稱鐸書法有擬山園石刻諸體悉備間作花草亦  
超脫名貴孟津筆底要自雙絕

黃孝子萬里尋親圖冊

國初有兩孝子皆萬里尋親名聞天下其一在康熙朝



自餘姚至粵西者翁孝子運槐運標也其一在順治朝  
自吾吳至黔南者黃孝子向堅也其父孔昭一命投荒  
此離天末已不作歸田之夢孝子眼枯足繭蹈白刃尋  
之卒御以歸孔昭有南歸草一卷見明人詩品此冊爲  
孝子白鹽井歸後所寫涉厯諸境黔中蔴哈葛鏡礪懸  
崖峭壁上鐫神留宇宙四大字第一厯頂站登關索嶺  
嶺有漢壽亭侯子祠第二嚮水關地古盤州北距夜郎  
關山峻險第三清浪衛城峙險一江兩崖置棧繫以筏  
絙貫桅末以渡第四逾秦關厯白口坡象兵塞道第五  
盤江界黔地源出吐蕃昔賢絙鐵成梁以通往來第六

濠雨渡湘江第七踰鷄鳴關層崖岵嶸苗獠據險築砦  
弟八覓威清複道厯癩石坡徬徨涉大溪弟九道經鷄  
足山之北麓居民傍水依山壘石爲屋弟十下武勝關  
遇雨扶二親踉蹌磴道間弟十一次滇南勝境坊大雪  
弟十二其間山川險惡兵戈阡危一蓋一囊儻然獨行  
於蠻烟瘴雨中循覽尺幅恍忽遇之蓋孝子本工山水  
重以足跡所至益復增長魄力開拓心胸海虞畫苑略  
謂嘗以身所經窮溪斷壑豺虎箐蠻悉繪圖以誌最爲  
得實宜徐俟齋引首卽以神留宇宙題之至鮑氏知不  
足齋刻尋親紀程附載黃端木岵岵圖冊亦題神留寓



宙者彼署丁酉清和月此署丙申秋日先後所作意境亦殊要皆和血淚於墨中運精誠於紙上當與邢渠哺父丁蘭刻木並傳直可作武梁祠畫象觀矣嗟乎篝火狐鳴鼎湖龍去風烟六詔誰爲失父零丁關塞萬重不阻尋親孝子百世之下可以聞風興起已至自署丙申爲順治十三年實尋親之後五年云

傳青主書畫卷

勝國諸老書畫公之佗尤不易得趙秋谷品其書爲本朝第一當時亦有一字千金之譽八法固有定論矣池北偶談謂畫入逸品畫徵錄謂印壑磊砢全以骨勝圖

繪寶鑑續纂謂邱壑迥不猶人余則謂諸家論先生不如先生自評嘗評其書曰任拙毋巧任醜毋媚任支離毋輕滑任真率毋安排畫何獨不然是卷書畫合璧尤足寶貴書錄杜陵雜詩共七首署曰真山時則辛酉寅月年七十有七矣畫則大起大落獨往獨來方寸五嶽眞力彌滿無一筆非巨然無一筆是南宋見下筆時目空餘子署曰太原山余於平齋兩疊軒中見之炙色形面平齋靳曰是希代珍須以君家宋拓大字麻姑碑易恐其悔亟如所請有毛意香及平齋長跋又李蘇鄰錄屈悔翁題先生畫詩凡五首悔翁名復蒲城人有弱水



集康熙朝以布衣游京師踞上坐公卿拜牀下執詩弟子禮確士子才云蓋亦奇士此卷得悔翁韻語弱齊之三絕乃全

楊龍友王烟客惲道生張爾唯四家山水合卷

崑山徐司寇舊藏楊王惲張四家合卷龍友似松雪道生似雲林烟客爾唯皆似大癡据爾唯乙未臘月跋云戊寅六月余訪道生於晉陵忽無補小有龍友先後至舟楫紛然在門淹留兩日而別今年余謝郡事無補持畫卷來索題前爲龍友後爲道生中爲烟客與余諦視幀首所跋正爲惲草堂燈下筆而烟客者亦戊寅所畫

也蓋戊寅爲崇禎十一年龍友爾唯遇無補於道生齋  
頭龍友以金山舟中背臨水村圖筆意贈別道生爾唯  
繼之至烟客則無補過婁所徵畫已在其年初秋矣龍  
友烟客爾唯三家爲畫中九友之最難得者卽以烟客  
論余訪求五十年眞蹟此外無幾况龍友爾唯乎無補  
爲楊補號古農又字曰補長洲沈得興欽圻有送楊曰  
補南還詩見國朝別裁集道生爲惲向後更字香山  
見讀畫錄記壬戌歲余避兵滬上有持此卷贗本求售  
者余笑謂之曰世間安有此無價寶哉未展卷時固料  
其必僞也旣而訪沈揖甫發其祕篋則眞者在焉驚愕



失喜不忍釋手顧揖甫非求沽待價者未若駟僧之易  
與也久之聞有田孟春者嘗以醫往來沈家因屬其爲  
回易使田有難色曰揖甫非求沽待價者雖然姑妄圖  
之翌日報余曰若能以朱提三百相博易可得也亟如  
言與之卷迺歸余余念鍾侯美玦因仲茂而喻旨和氏  
寶璧易趙王以連城結習所存古今一轍爰記顛末以  
告後人





過雲樓書畫記卷第六

元和顧氏

畫類六

惲南田靈巖山圖卷

自題先香山翁寫靈巖圖題其幀首曰此山之趣在背寺之趣在面水之趣在天蓋以側面取勢令湖光出其上惜此圖逸去無從懸購今追用此語直寫正峰自落紅亭以上翦取芙蓉城一片爾而全形具焉如須彌山七寶所成上下四旁各見一種色色不同所見皆須彌也此蓋先生揭出作意謂圖從山後入手自松林至茆亭徑路絕矣仰望峰頂石級一綫直抵圓照塔下琳宮

梵宇複沓四合始倒寫至山前復見湖上遠峰微露數  
尖若在雲氣滅沒中則又旁及側面矣結構之妙直具  
杜陵倒聽楓葉背指菊花詩意若蘇長公橫看成嶺側  
成峰句猶未足與喁于也又自題云昔黃子久畫富春  
山卷頗自矜貴攜行簞歷數年而後成頃來山中鏡清  
樓上洒墨立就曾無停慮工乃貴遲拙何取速筆先之  
意深愧於古人矣想見先生胸有丘壑思入風雲布置  
不苟然後下筆便如華嚴樓閣彈指湧見卷爲壽方外  
退翁作故前有退翁自壽示簡石西堂一絕後有明曇  
靈巖山賦并音釋余懷七絕五首皆當時爲壽者至黃



子錫江行雜詠四首則錄示簡石矣余懷字淡心見復社紀事黃子錫字復仲嘉興人見復社姓氏錄明曇爲先生父諦視之賦亦先生書也

甌香館寫生冊

梅桃荷紫牡丹野薔薇桂菊各一枝無款附六絕句署臘月廿一日舟泊虎林北關書寄顧若思有若思喜方術能以爐鼎煉烹草木花果成露療病余與相遇於婁東一見契合云云詩跋皆見蔣生沐所輯甌香館集殘年風雪旅泊江關裂指折膠成此冷趣究以難於傳色故枝頭金粟猶未結小盤虬也後有札云花頭俱未完

此非捉刀人所能著筆內松柏一葉亦欲換去因凍筆  
不得意也今松柏已去花仍未完然則翁亦自喜尋常  
顏色經用鮮明使他手爲之必不能生香活色使人意  
消也又云先將贈詩錄後幅以爲同人倡可移作前幅  
爲妙他日尙欲重書因舟中動搖甚難作書也詩尙有  
題各幅花頭數首舟次不及錄矣因歎前輩愛好出自  
天然惜若思相逢初不竟此粉墨微勳耳冊書畫各七  
幀庚申前曾向同郡程君心伯借觀錄其詩墨亂後購  
得而書札已佚乃發篋補書冊尾今又展轉購得此牘  
仍得裝入平地瀉水各自流去上天破鏡忽又飛來喜



心翻到極不覺言之覩縷

南田墨妙冊

畫徵錄稱正叔寫生簡潔賦色明麗天機物趣畢集豪  
端又稱正叔雖專寫生山水亦間爲之超逸名貴深得  
元人冷澹幽雋之致此寫花卉八葉山水四葉如天女  
明睇將瞬又如瑤草琪花非復人間凡豔嫣然一笑桃  
李皆粗俗矣幅端間題數語皆足備畫苑故實如所云  
曾見管夫人寫綠竹其甥王叔明畫坡石最後松雪翁  
補叢花苔草足稱三絕此景略師其意仲姬是畫向無  
著錄得先生表襮當與妮古錄所載畫懸崖朱竹一枝

並傳外孫誤甥明代已然又云山陰夜雪圖北宋李營  
丘真蹟董宗伯嘗題營丘李夫子天下山水師縱筆寫  
寒林千金難易之爲墨苑所宗如此按畫徵錄稱烟客  
遇名蹟不惜千金購之如李營丘山陰泛雪圖費至二  
十鎰則圖爲烟客家藏先生所見宗伯題句乃是用賈  
秋壑詩見寓意錄載秋壑題李營丘秋林圖宗伯有感  
於千金難易之語情事適合特取放筆寫秋林句改竄  
兩字移題夜雪圖耳傳諸後世亦佳話也又冊中花葉  
樹石間間作小押字似三百九十七似是收藏家記所  
得之值因并記之



憚南田蒲塘真趣圖軸

漁洋露筋詞詩云行人繫纜月初墮門外野風開白蓮  
不著一字自饒風韻以神名蕭荷花也正叔以壬戌六  
月銷暑戲圖蒲塘真趣白題金粉散蒲塘露溼雲衣綠  
殘葉破秋風驚起鴛鴦宿又云此幀在東臯池上醉後  
抹塗殘荷離披蘆草交橫略得寒汀寂寞之致卻後數  
年獲觀荆溪之南山閣時乙丑初冬南田又題皆與吳  
越所見書畫錄合惟紙高四尺且無圍客寄岳雲諸印  
知非懷煙閣物然而露粉流紅水佩交翠冷光零亂浮  
動紙上月曉風清欲墮時也又被甌香館主句魂攝魄

矣

南田仿叔明夏山圖軸

坡上一人巾服臨流坐科頭童子抱琴出松翠間而對  
山四松之陰茅亭如笠上有危崖飛瀑題云萬壑響松  
風百灘度流水戲臨黃鶴山樵夏山圖意按漁山亦喜  
寫此景墨井題跋所謂萬壑響松風百灘度流水下有  
跨驢人蕭蕭吹凍耳俞清老詩也此雲溪逸史寫夏山  
故斷章取義對之謾謾生六月涼

南田摹癡翁富春大嶺圖軸

國朝諸大家山水皆出一峰而南田獨具面目此寫層



巒疊嶂坡下古木千章人家三兩有皴皴而無渲染純  
是筋骨雖摹富春大嶺卻得陡壑密林意自題豪端有  
山川破墨了無礙理在筆墨中趣在筆墨外黃子久得  
其秀潤易師其蒼莽難然必先繇秀潤而後漸入蒼莽  
乃佳爾蓋癡翁不可及處卽在秀潤中有蒼莽之氣同  
時張伯雨稱其峰巒深厚草木華滋尙是皮相園客生  
五百年後乃能持論如此真一口吸盡西江水

憚南田設色蟠桃圖軸

燕脂汁綠寫蟠桃一樹結實三五枚帶露可摘含風欲  
動枝葉停空尤饒韻致上書七言絕句云蟠桃一熟九

千年方朔偷來獻壽筵纔入口時甜勝蜜頓教凡骨變成僊此臨唐解元蟠桃圖爲虞翁壽者其歲月乃辛酉四月攷吳越所見書畫錄畫乃壽顧虞來其王母之伯兄也後爲其從子方暘藏知畫向藏弇山余於庚申後得之

墨井道人橫山晴靄圖卷

平坡板橋環以朱闌一翁紅衣拄杖一青衣人前行一童子抱琴隨之再進則四山回互萬松合沓其中土地平曠屋舍儼然又於峰陰時見樓閣所謂白雲深處有人家也山後野橋茆屋自成墟落又似寒鴉數點流水



遶孤村風景自題云筆正寫山橫烟雲亂石生破窗蕉  
雨過添卻硯池平十日畫成海天雨霽紅日牕明展卷  
題之康熙丙戌年秋仲墨井道人別紙墨道人又跋云  
余近年作畫似勤似嬾有時不辭呵凍忘暑忘餐揮豪  
疾就有時春暝晴牕楮墨精良對之沈睡云云與墨井  
題跋所錄微有異同後有戴貞石三跋謂是道人浮海  
後筆丙戌康熙四十五年也

吳漁山贈許青嶼墨井草堂消夏圖卷

夏木黃鸝水田白鷺輞川積雨景也漁山本此更寫柳  
陰畫橋藉艸垂釣對岸粉牆內草堂南嚮一翁坦腹執

卷神閒意適階下乳鴨池塘徧帖浮萍其流遶回廊而  
西架木爲梁編荆作籬旁通茅屋兩楹意是庖湑庭中  
石闌土甃置軍持於側殆墨井矣墨井者張雲章樸村  
文集有墨井道人傳云所居有言子之墨井遂以墨井  
名其詩草而自號曰墨井道人是也井畔柴扉雙掩近  
接山坡古木修篁環抱左右惟見青枝綠葉與白雲無  
盡而已款云梅雨初晴曉來獨坐墨井草堂師古人消  
夏圖寄與毘陵青嶼先生以致久遠之懷並署己未年  
四月十日是歲爲康熙十八年青嶼罷官已久施愚山  
學餘文集許侍御詩序云青嶼爲侍御號稱敢言按秦



有聲績以細故去官日與其友吳漁山用文酒相娛放浪公卿間今墨井詩鈔有秋日同許青嶼侍御過堯峰及庚戌夏青嶼侍御同予北行諸詩蓋青嶼漁山同入西教往還甚契洽云

墨井道人山水冊

直幅山水大冊寫水墨者五青綠者二首幅題云予從茗雪歸過吳門訪默公公留於興福精舍不覺兩月以去春索畫素冊早晚戲弄筆墨遂得十幀末幅題云吾禪友默容從余繪事有志於詩學使其早得三昧當以弘秀名聞不幸挂履高巖其命矣夫予年來每過興福

輒爲隕涕其徒聖子喜其復修家學一燈耿然默容爲  
不亡矣此冊往予爲默容所作今潤色并及之是冊本  
十幀後爲聖子潤色時尙無闕也不知何時佚奪殊堪  
歎惋然其細筆乾皴精深刻露如入旃檀林寸寸皆香  
中間泛雪一幀真如程周量題早雪圖歌所謂殘條拂  
地凍欲僵有客孤舟去如駛固明明開堂演法欲傳曹  
溪一滴水者耶冊後有徐子能許青嶼方邵村史霽菴  
錢籜石跋

吳漁山柳村秋思圖軸

古柳陰中野橋水榭沙岸如雪鷺鷥飲啄其間若覓魚



然遠峰外歸鴉數點瘦塔一枝環以樓閣叢樹有雲氣  
遶之幅端題云昔予寫柳村秋思留別友人民譽得而  
藏之予謂其柳葉翩翩尙有未盡故復寫此或以爲不  
然民譽善畫之善鑒者定有以教我下書壬午年暑月  
爲康熙四十二年漁山晚年之作民譽爲金造士嘉定  
人與漁山交厚工山水墨井詩鈔有民譽金子惠羊肩  
山童不報卻之卽其人也

吳漁山湖山春曉圖軸

蒼松翠柏蒼靄湖隄小紅橋上一朱衣叟前行童子背  
琴若隨歸別墅者閒門臨水老屋傍山白鶴青林容與

牆內遙看峰影俯入波心舟子方撐篙近榭朱樓一角  
盪漾水光款署湖山春曉圖又云帶郭遠湖春門開曲  
水濱堂低三面屋巷窄一條塵花買擔頭活詩徵驢背  
新到來逢醉客知散暖比鄰此予贈松厓先生新居之  
詩并書請正辛酉上元按松厓爲錢封字軼秦隱西湖  
游情翰墨興至寫山水得煙雲出沒峰巒隱見之態見  
圖繪寶鑑續纂故漁山贈以湖上之詩云

吳漁山贈湘碧山水軸

坡上長松七八株環繞水亭小奚凭欄而立仰睇峭磴  
千盤孤峰百丈切雲摩漢上方詩云一雨初晴樹欲秋



溪頭小屋似漁舟山童解得藏名姓不敢披裘釣碧流  
漁山吳子厯山居曉坐并題七言呈湘翁夫子丙辰年  
三月十二日湘翁謂湘碧按墨井道人傳但云少與石  
谷同受學於王太常之門今觀此圖知其亦受學於廉  
州矣

吳墨井秦吉了軸

虬松天矯鱗鬣欲飛一翁杖履行斷岸間流水半灣蹇  
裳可涉過此則花徑草堂其中讀書不輟也屋後山路  
紆曲林巒鬱盤翠撲簷楹青浮薨棟層累百折至精藍  
塔院廡及其半知奇峰落天外矣題云李公擇初學草

書劉貢父謂之鸚哥嬌意鸚鵡之於人言不過數句其  
後稍進問於東坡坡云可作秦吉了矣予稚年學畫搢  
搢塗抹不逾鸚哥今又老筆荒蹉勉倣叔明質之民譽  
得無少似秦吉了否按題語見墨井題跋惟問於東坡  
下作吾書比舊如何坡云可作秦吉了矣余畫雖未積  
學而近之作者不知少似秦吉了否耶與此有異蓋存  
藁時不無改竄耳

王烟客仿古山水冊

明畫錄稱烟客山水規摹古法筆墨蒼秀嘗擇名蹟廿  
四幅縮本裝成巨冊載在行笥出入與偕其根蒂故深



也此冊白宋紙本十幀其仿北苑巨然米元暉倪高士  
梅花道人大癡皆用水墨仿趙令穰村居伯駒江皋秋  
色文敏夏木垂陰則用青綠仿黃子久用淺絳蓋於宋  
元大家畦徑壺奧皆夙所諳習自能直闢古人之室非  
若今世粗解塗抹略記姓名輒詡摹仿實於各家家數  
曹然若墜雲霧焉盲人觀優野叟說古何以異哉冊初  
爲新安黃秋山物有王修竹題記黃晚年病篤以贈嘉  
善朱得天朱又贈張叔未其署籤及前後題跋皆清儀  
老人手迹也

西廬老人爲子顥菴仿古冊

墨寫北苑陸天游黃子久張子政黃鶴山樵梅花道人  
倪高士徐幼文八家筆意又取趙承旨及令穰江村月  
夜大癡秋山圖以青綠淺絳寫之末署壬寅清和仿古  
十二幀後有跋云吾年來爲賦役所困塵坌滿眼愁鬱  
填胸於筆墨諸緣久復落落此冊爲兒子揆裝以乞畫  
者日置案頭每當煩懣交併無可奈何輒一弄筆以自  
遣又云諸幀雖借古人之名漫爲題仿實未能少窺其  
藩然坡公有言論畫以形似見與兒童鄰則臨摹古蹟  
尺尺寸寸而求其肖者要非得畫之真山谷詩云文章  
最忌隨人後自成一家始逼真正當與坡語並參也考



樸村文集工部屯田司主事郭公墓誌銘有云順治十八年巡撫某憤其所屬士大夫之逋糧者彙爲籍疏上之悉將褫革名曰奏銷自縉紳先生多蹈密網士子有至空庠者所謂奏銷案奉常當日必爲所累跋中故有賦役語也

王西廬荅菊軸

烟客此作雖畢竹癡署爲倣子久實則烘暈水墨參用小米雲山法也故氣韻深厚筆致沈雄款署甲辰九月含素以佳菊見贈寫此奉荅并鈐歸村印按樸村文集有歸村躬耕記稱烟客自號歸村老農此幀是其得意

之作故特誌之又本幅有湘碧跋亦見吳越所見書畫錄

王烟客仿黃子久秋山曉霽圖軸

以淺絳寫山林而於平坡及點子樹復用石綠渲染遂覺丹黃紫翠滿紙秋色又西廬生平絕不畫人其後麓臺司農承之頗似嬾瓚家法此寫一翁携杖過橋童子捧書隨行亦如元鎮畫龍門僧偶然破例至其繁而不重密而不窒千巖萬壑仍復位置從容益信衣鉢真傳的在烏目矣款署己酉秋仲乃康熙八年也

王烟客仙山樓閣圖軸



坡上兩松虬枝宛蟠龍鱗飛動茅亭一角隱隱出深翠  
中仰視白雲在空橫束山腰樓臺半明時露松頂旁有  
瀑布一道瀉珠漱玉傳響青林玩其款署知乙巳冬日  
寫仙山樓閣圖壽靜孚母氏方太夫人七袞也書堂有  
梅村題記云陳子靜孚母夫人方太君七十王烟客奉  
常王湘碧郡伯繪仙山樓閣圖以爲祝郡伯所製可以  
頡昂松雪若太常此幀蒼深高遠尺幅中恍見仙真棲  
止出入於烟雲縹緲間筆墨之奇非僅得子久三昧也  
云云祭酒精於六法評隲至當愚山學餘詩集王太常  
烟客畫歌有云乍看僧巨然再觀癡子久晴山溼空翠

輕雲冒林藪又云峽裏飛流迴積雪松間細葉垂蒼藤  
蓋不啻對此圖放歌矣

年譜附

明萬厯二十年壬辰公生

公姓王氏諱時敏

初名贊虞至十

二歲更名

字遜之號烟客後取龐居士詩惟吾自偶諧自

號偶諧道人繼葺小齋用昌黎斂退就新儒之句顏  
曰新儒又號儒齋晚歲築室西郊之歸村稱西田主  
人亦號歸村老農旣而於潭西結茅屋三間爲西廬  
又稱西廬老人先世系出山西太原南渡後居河南  
汴梁厯傳至諱求一始遷平江路嘉定之樂智鄉明



宏治間割隸太倉遂爲州人八傳至文肅公諱錫爵  
官至建極殿大學士爲公之王父父諱衡號緱山萬  
厯辛丑翰林院編修並崇祀鄉賢嫡母金徐馮生母  
周以八月十三日生公

二十一年癸巳二歲 嫡繼母馮夫人歿年二十三  
三十六年戊申十七歲 李碩人來歸公幼依文肅寢  
息至是始別居

三十七年己酉十八歲 正月二十九日緱山公歿年  
四十九

三十八年庚戌十九歲 十二月二十九日文肅公薨

壽七十七

三十九年辛亥二十歲 先是緱山公里居之暇詮次  
文肅年譜公於喪次更爲補輯又刻文肅奏草文集  
四十一年癸丑二十二歲 二月八日葬文肅於楓橋  
鳳皇墩之賜塋

四十二年甲寅二十三歲 自辛亥夏有恩卹璽丞之  
詔服闋北上唐叔達婁子柔並贈詩序至京拜官

四十三年乙卯二十四歲 奉命視葬益藩隨周太君  
旋里李碩人九月十六日卒年二十三

四十四年丙辰二十五歲 爲緱山公刻詩文集



四十五年丁巳二十六歲 春入都太君力疾偕行

四十六年戊午二十七歲 致祭衡藩奉太君歸嗣是

憚於遠役不復同行

四十七年己未二十八歲 夏拓文肅苟園為花畦七

月初十日長子挺生李碩人所生三子俱殤其九子長減菴公諱挺側室孫氏出次

芝廛公諱揆側室徐氏出次隨菴公諱撰側室姚氏出次平宰公諱持姚氏出次巢松公諱扑徐氏出次

砥菴公諱扶姚氏出次汲園公諱攄徐氏出次顯菴公諱揆側室沈氏出次南湖公諱抑側室徐氏出南

湖公與芝廛公巢松公汲園公非同母蓋有兩徐氏也

四十八年是年八月後庚申二十九歲 文肅祠成正

月二十七日迎像入祀旋送主鄉賢祠冬游廬山

天啟四年甲子三十三歲 夏陞尙寶卿秋得中州捧  
詔之使事畢旋里

六年丙寅三十五歲 自甲秋旋里至是北上入都數

感惡夢汲汲思歸適有閩中頒詔之使七月十七日

抵家太君方病相與抱持而泣按公跋自作幔亭秋  
色圖云丙寅秋杪曾

以使事入閩長揖幔亭君因戲繪其接笋圖以歸又  
爲葉雁湖作武夷山圖跋云丙寅秋杪以使事入閩

曾游武夷至  
三曲而止

七年丁卯三十六歲 四月七日華亭董思翁其昌陳

眉公繼儒過南園繡雪堂話雨留宿思翁題話雨二

字於壁附公書問梅禪院題額後云先文肅種梅數  
百株於此園每值早春寒香競發萼綠紅白



花相錯如繡故有繡雪之稱

秋十月三日周太君歿年六十

崇禎元年戊辰三十七歲 往雲棲爲太君作佛事修

復海印菴

三年庚午三十九歲 綏山公崇祀鄉賢

四年辛未四十歲 三月北行舟中擬子久秋山圖

秋以存問周藩之役至家

五年壬申四十一歲 夏祔葬太君於綏山公新塋

六年癸酉四十二歲 秋北行

七年甲戌四十三歲 東園落成自庚申經始改作再

四頗極臺榭之美有藻野堂揖山樓涼心閣期仙廬

掃花菴香綠步綰春橋沁雪林梅花廊翦鑑亭鏡上  
舫清聽閣遠風閣密圓閣畫就香霞檻雜花林真度  
菴諸勝費以累萬以樂郊名之著聲海內

八年乙亥四十四歲 春抵都

九年丙子四十五歲 秋陞太常寺少卿初冬山行以  
楓林丹黃悅目仿黃子久筆意寫成長幅

十年丁丑四十六歲 正月九日題差得糧長二月九  
日出都至南都完差事五月抵家

十一年戊寅四十七歲 冬十一月初自家北行

十二年己卯四十八歲 夏持節冊封岷世子其地爲



楚南絕徼公衝炎出都暫返里門七月中至南京病瘡力疾勉完使事十月旋里消瘦骨立遂不作還朝之想

十三年庚辰四十九歲 春具疏遣老僕王宰入都繳節從此不復出山

十四年辛巳五十歲 五十初度詣吳門瑞光寺禮懺設席金閭旬餘乃歸

十五年壬午五十一歲 春作一家同善會廣施粥餅又賸漕糧萬金衣飾酒器盡歸質庫八月十六日長孫原祁生次子揆所出也

國朝順治元年甲申五十三歲 公抱病里居值國變  
五內摧裂不自意生會南都擁立福藩起陞太常寺  
正卿公引疾疏辭

二年乙酉五十四歲 二月遇侯廣成黃陶菴兩先生  
於鄧村去秋被召已得請復爲臺中疏薦仍不赴  
司禮姚在洲爲子撰持扶生母之弟秋杪子身至述  
國變事甚悉相對灑涕館之別室老於婁東

三年丙戌五十五歲 南園梅花盛開時通州白在湄  
及其子或如俱善琵琶流落吾州延之園中爲度新  
聲適梅村至置酒白生朗彈一曲敘述亂離豪嘈淒



切中常侍姚在洲因言愍帝在玉熙宮中梨園子弟  
奏水嬉過錦諸戲內才人於暖閣齋鏤金曲柄琵琶  
彈清商雜調自河南寇亂無復此樂相對哽咽梅村  
因作琵琶行紀事秋築西田於歸涇構農慶堂語稼  
軒飯犢軒逢渠處巢安室梅村爲作歸村躬耕記

四年丁亥五十六歲

夏避暑漁莊日畫十幅秋農慶

堂菊花盛開王遺民瑞國吳梅村偉業朱昭芑明鎬

黃攝六翼聖李爾公可衛賓侯可汧

二李崑山人  
公之內姪同

過夜飲踰月蒼雪法師亦至西田看菊互相唱和

七年庚寅五十九歲

西田中綠畫閣落成復構西廬

延畫友長洲卞潤甫文瑜繪壁高妙直追董巨公作  
長歌紀之時招梅村攝六諸公觴咏屬和成帙十月  
旣望詞人楊曰補見訪集菊下以詩倡和

八年辛卯六十歲 閏二月入山觀梅

九年壬辰六十一歲 春晴偶步後園池上荷花盛開  
賦詩志異春曉從西田放棹探梅蔡灣飲曹氏花下  
以詩紀之

十一年甲午六十三歲 東郊藻野堂歲久朽壤改築  
小堂三楹旁構疏快軒

十二年乙未六十四歲 常熟楊子常彝來訪留飲拙



修堂陸桴亭世儀盛寒溪敬俱在焉

十三年丙申六十五歲 九月望西田積潦與月光交  
映滉瀟空明一碧千頃公與客泛舟其中笛聲縹緲  
恍在天際樂飲忘疲有詩一律以紀其勝黃攝六及  
陳確菴瑚並過西田與公倡和仲冬子撰輯公詩分  
二卷一爲偶諧草厯仕時所著一爲西廬草歸田後  
所著乞序於嘉定陸元輔

十四年丁酉六十六歲 春石公和尚在隆福寺講法  
華經公率三子聽講

十五年戊戌六十七歲 元旦次日立春有七律一章

十六年己亥六十八歲 三月游武林從者子挺撰掞  
三人徧訪名勝禮具德和尚於靈隱豁堂和尚於淨  
慈最後雲棲謁石公大師

十八年辛丑七十歲 有七十自詠詩四律

康熙二年癸卯七十二歲 西田土木未息約雲間張  
南垣疊石種樹又修葺後園改築亭榭爲衰年憇息  
之所冬延蘇崑生教家僮時曲爲娛老計

四年乙巳七十四歲 元夕往虞山觀燈仲春於子抑  
几頭瞥見畫冊乃崇禎辛未赴補時舟中所作忽忽  
將四十年中間陵谷滄桑變遷多故俯仰今昔不勝



愀歎且謂筆墨之功視壯時略不少進小藝尙爾何  
況其他因題數行於首九月望邀吳梅村諸公郊園  
小集陳麋涇許九日以詩貽公公亦賦詩奉謝

七年戊申七十七歲 九月游西泠僦居湖樓

八年己酉七十八歲 三月渡太湖至洞庭次日登莫

釐峰遊翠峰寺諸勝并遊席氏園十月詣靈巖山

九年庚戌七十九歲 冬日在拙修堂王石谷翬在座  
忽暈去少頃平復如常

十年辛亥八十歲 八月舉八十觴子撰挾徧徵壽言  
以累百計

十二年癸丑八十二歲

公倡議修建鐘樓請法印禪

師住持

十七年戊午八十七歲

地師江右熊開先爲公卜吉

壤於二十都金字圩墅溝舊宅之左是時營築方興有五鶴盤旋之瑞

十八年己未八十八歲

夏邀顧樊村盛寒溪諸公同

賞芍藥

十九年庚申八十九歲

六月七日猶手書徑尺榜額

是夕諸子侍側坐談娓娓神氣朗然次晚忽夢西方三聖人現丈六金身垂手相接翼日寒疾陡作毘陵



惲南田壽平慕公已久時適與石谷來謁病榻一見而別至十七日酉時薨於寢病中數稱雪老師蓋徑嶠老人公向所皈依者子九人時存者揆撰抃攄揆抑女子八人孫十六人孫女二十一人曾孫九人曾孫女十二人是冬十二月十二日諸子奉公及李碩人柩合葬而以側室徐姚沈諸碩人附焉

公及李碩人墓誌銘

李壽撰神道碑宋德宜撰徐碩人墓誌銘汪琬撰姚碩人墓誌銘黃與堅撰沈碩人墓誌銘熊賜履撰時九子生母徐碩人尚在焉二十二年正月二十二日祀鄉賢祠學

者私諡爲恭孝先生公自幼至壯未嘗廢學垂老歸田更涉獵羣書晚年多病猶依簷映日手一卷不暫

釋繪事尤所癖嗜見古人真蹟不惜重值購藏宋元  
名家無不摹倣而子久尤爲專詣董宗伯每見公作  
必讚歎題識有蒼秀高華奪幟古人之稱病曰後倣  
惠崇趙大年作村莊小景用筆纖細設色鮮妍不類  
平日筆法眞行書學褚河南八分師受禪碑參用夏  
承碑法署膀字大數尺者尤雄偉有勢於尺牘師蘇  
子瞻黃山谷於詩倣白香山陸渭南至竺乾之學夙  
所皈心諸方尊宿之至吳者必擔簦參訪所著偶諧  
草西廬草及詩餘若干闕懿訓一冊俱係子撰編集并尺牘  
家書百餘則子姓中傳寫不置寶仁近更搜輯雜體



文一卷詩詞拾遺一卷書畫題跋一冊藏於家

先生以相門佳公子厝意文獻交游如元宰駿公  
皆耆德異能極一時勝選滄桑後屏棄人事手種  
花藥琴詩自娛偶寓志六法靜穆之氣迎人尺幅  
閒令讀者神遠登其堂者惟道威言夏攝六最密  
類勝國遺老並世眾君子或嬰吏議或不終箕願  
之高而先生悲遯邱樊默容盛世名溢宇內爲時  
逸民厥養遂已余雅慕先生暇輒訪其年譜後晤  
詠宜文學標林稔爲先生裔孫亟訊之迺於行笈  
中出是譜見示則其七世孫寶仁所編都四卷余

錄副藏之而掇其大凡存什之一二附葉卷中  
詒世之心醉先生筆墨者

王圓照仿宋元山水十幀冊

圓照從臨撫入手者也故其蹊徑已罄全是古人此冊  
仿趙文敏青綠子久淺絳李營丘粉筆以及江貫道燕  
文貴叔明梅道人倪高士陳惟允馬文璧之水墨皴擦  
烘染一一還他廬山真面既無牽合之病并絕自撰之  
筆使古名家吮豪和墨恐亦不過如是自跋云歲在戊  
申春王正月庭前綠萼初華暗香入簾案頭筆硯精良  
頗覺清適偶得宋元畫冊遂染成此十幀想見新年清



課高雅絕倫後附汪荅文云廉州寫出仲圭神沈賁園  
亦云廉州工於摹古是幅深得浮嵐暖翠三昧知舊是  
對題惜佚去八家耳然使吾輩生二百年後證爲同時  
推許不僅松勢高低疑鶴啄溪光參伍學蠶頭者固猶  
幸其未付山窗障北風也

圓照仿宋元八家冊

縮本倣北苑巨然子久高尙書叔明馬文璧范寬倪高  
士款云乙巳九秋擬古八幀似子羽詞兄按子羽爲黃  
翼聖亦太倉人崇禎中辟授新都知縣升吉安知州有  
蓮蘂居士詩選見明詩綜畫用水墨間以赭綠設色或

用花青水抹遠天以烘託雪峰又拼水抹之以烘託晴  
嵐惟范中立積雪高彥敬青山白雲而已然古秀在骨  
蒼遠有神只尺應須論萬里也蓋湘碧老年喜爲小冊  
向見玉雨堂書畫記載己酉夏日避暑半塘僧舍摹古  
十冊寬廣不過數寸而高深平遠無體不備與此絕似  
而款署乙巳尙在己酉前四年精力自當更勝惜不能  
從小亭借勘之首有王夢樓題籤

王圓照寫夢境圖軸

山列屏腰坡平鏡面草堂南嚮兩廊翼張門前雜植石  
楠山柿之屬承以湖石如排衙然四面風漪鱗鱗綠皺



岸左小橋三折有漁父刺船而至奇峰突起峭厓斗絕  
水亭一角望見堂中一人席地面壁而坐畫師山樵點  
苔大或如豆幅端紀夢其略云今六月避暑半塘無聊  
晝寢忽夢入山水間中有書屋一區背山面湖迴廊曲  
室琴几瀟洒花竹扶疏宛似輞川軒外卷簾清波浩渺  
中流一叟乘棹垂綸曠然自得予趺坐中堂觀左壁畫  
乃思翁筆幽微澹遠不覺撫掌讚歎遂爾驚醒鼻端拂  
拂猶染異香令人有天際真人想起而滌硯伸紙記境  
成圖不爽豪髮懸之坐右以當望梅止渴而已擲筆惘  
然丙申夏六月哉生明王鑑識又題靜巖老親翁索畫



云云桉靜巖當姓郁梅村郁靜巖家譜序云余外家郁氏爲吳中右姓其後人靜巖名滋篤行君子也卽其人矣

王圓照仿趙文敏九夏松風圖軸

大青綠寫層巒聳翠上接旻空巖腰瀑布奔流有擘開青玉峽之勢樓臺一角繚以重闌又不啻碧城十二也兩松屈曲如盤虬其最高峰用鵲華秋色皴法無款石谷題云吾師廉州王公筆墨妙天下此倣趙文敏九夏松風圖設色幽秀神韻超逸兼得北宋高賢三昧余於丙申嘉平過婁欣獲披玩恍覩光霽於五十年前矣何



幸如之跋署康熙三十二年此畫當作於崇禎十六七年畫徵錄稱畫有南北宗至石谷而合今觀是製則廉州早合兩派爲一矣先河左海豈不信然

王圓照仿子久浮嵐暖翠圖軸

奇峰萬疊峭磴百盤水光墨暈極望迷漫若有雲霧籠罩其上兩山斗合處跨以飛梁有瀑布砒厓轉石一落千丈想山下人家隱隱聞晴雷矣款云癸丑小春擬子久浮嵐暖翠所贈懷老不詳誰何湘碧七十六歲筆也左方題詩云交交林路翳鬱鬱嵐光浮參差暎數家飛瀑自天流水折山更旋秋色瀾然幽客懷對澄澈何必

問瀛洲懷一所藏畫康熙甲寅夏五月龍眠方亨咸觀  
因題咸亨字邵村桐城人順治丁亥進士善山水倣黃  
子久筆意見圖繪寶鑑續纂

王麓臺湖湘山水圖卷

卷長二丈許用淺絳法寫山水林泉而以破墨汁綠點  
苔蒼蒼莽莽中具清閑超曠之境直是大癡筆意神而  
化矣自題幼芬大弟黔中典試回備述湖湘山水之妙  
欲余作長卷以紀其勝余聞洞庭以南峰巒洞壑靈奇  
萃焉或爲峭拔或爲幽深或雲樹之變幻蔽虧或沙水  
之容與澹蕩隨晦明風雨以成變化余且未經歷其地



非筆所能摹寫也昔洪谷子遇異人論畫云用其意不  
泥其迹此圖余亦以意爲之耳自客秋經營至今意興  
興合輒爲點染不問位置之得似與否圖成而歸之以  
供吾弟一噓也時康熙辛巳秋八月四日幼芬爲王奕  
清辛未進士康熙三十八年己卯科以編修主貴州鄉  
試見清祕述聞此卷初見於滬上骨董家居奇特甚且  
軍書旁午日與盾鼻爲伍未遑問也踰十年復於四明  
遇之則大慙旣除重見承平凡士夫之嗜法書名畫者  
更事爬抉余計司農筆不易得設色尤罕且度不能爲  
趙德父還徐熙牡丹圖也遂以重值得之並徵歸安沈

仲復觀察夫婦題詠藏諸吾樓然則一畫之微遲早得失尙有定數可以委心任運矣

王麓臺爲趙松一仿子久山水卷

此卷長短與前相等用墨筆皴擦渲染元氣淋漓是取徑癡黃而得巨僧三昧者視前卷爲尤勝款署庚午初秋蓋爲趙松一倣黃子久筆也跋云古人有云一日相思千里命駕此交道之厚也余與松一趙兄交甚厚於余之入都也渡江涉淮送及清江浦而返此亦古人千里命駕之意也余無以爲情舟次作長卷以贈之是卷始於五月十八日成於七月十七日凡兩閱月松一題



七古卷後云羨君愛畫得畫髓下筆真能見山水倪迂  
秀潔大癡豪君兩得之兼兩美末署庚午初冬趙貞松  
一題按王崇簡青箱堂文集有趙松一詩序云皆歷年  
江山感興之章而贈答間亦有之然則是詩當在集中  
傳諸將來兩家風誼當與石田送敘州守吳遜菴至京  
江作送遠圖以贈並垂不朽矣後有許珊林觀款及吳  
平齋姻家跋許在道光間吳則同治辛未余得此卷從  
甬上寄示時語也

王麓臺仿宋元山水十幅冊

居易錄云茂京爲予雜仿荆關董巨倪黃諸大家山水

十幅眞元人得意之筆此冊自題有曰北苑秋山曰繡  
嶺長松錦林傑閣荆關遺意曰梅道人江雨泊舟圖筆  
曰倣高尙書曰倣黃子久秋山曰大癡良常山館筆意  
曰余未見鵲華秋色聞其秀逸簡淡非松雪本色寫此  
大意曰趙子昂僊山樓閣曰寫曹雲西筆曰疏林溪館  
倣倪高士設色小景細秀明逸士氣盎然且平生畫冊  
流傳絕少疑卽是贈漁洋者然但署戊子冬日倣宋元  
諸家於雙藤書屋則又非也前有錢叔蓋題王麓臺畫  
冊五字後有趙撫叔記云同治壬戌十一月觀於永嘉  
官署距叔蓋殉節已三十三年矣蓋叔蓋撫叔並精篆



刻嗜金石論學相同動其故友之思也又云己巳八月  
客杭州澹如觀察屬爲重跋數語則亂後爲秦澹如題  
未幾由澹如歸余楊詠春借觀又作小篆題籤詠春治  
說文手書五百四十部至老不倦與攜叔叔蓋皆咸豐  
朝名士迺叔蓋國殤攜叔中壽詠春亦旋歸道山與此  
冊相處者惟澹如與余在耳莫唱貞元供奉曲當時朝  
士已無多三復此語歎息彌襟

王麓臺高岫晴烟圖軸

疏林山徑獨木溪橋松亭外壘四石如棋局想是高人  
逸士坐看雲起處也其上四山回抱一水渟泓孫興公

天台山賦云倒景重淵匿峰千嶺畫境似之款署高岫  
晴烟蓋戊寅冬日眞州道中倣巨然筆贈台臣者按台  
臣爲沈受宏太倉歲貢生有白淩集見國朝詩別裁

集

王麓臺倣黃鶴山樵松溪仙館圖軸

溪上山形如玦人家環居其下屋後飛瀑門前流水由  
小橋縈遶至前峰而止山無雜樹高低合沓彌望青蔥  
不知幾費百錢買此松羔也石徑紆迴水閣虛敞又時  
於林罅見之款稱壬申秋日蓀服爲雲襄先生稱觴南  
歸仿黃鶴山樵寫松溪仙館爲贈余按懷清堂集有題



茂京給諫仿荆關青柯坪圖云出藍標格無差別一樣  
秋山樓觀圖此作蹊徑不凡真可云一樣松山書屋圖  
矣

王耕烟黃鶴傳鐙圖卷

石谷爲其弟子常熟顧苐文作款署不繫歲月據圓照  
題有癸丑小春字審爲四十時筆墨其時正摹追宋元  
竭思力以赴之每仿一家輒得其神髓猶青邱之詩雜  
師八代宋元未嘗自名一派亦不礙其爲大家也迨六  
十後雖曰食古能化漸近自然然聲望日隆羔雁日至  
業驚孟公之座難築姬赧之臺回視盛年妙詣騁妍獵

微不免有燭武精亡趙孟耄及之感耳故余愛重石谷  
在合古不在離古貴老賤少好高蔽之竊未敢附和是  
圖葵藿縈渚鳬鷺欲聲松杉繚隄嵐嶂絢影雜樹迷遠  
將詢橐駝纖雲停空或待若士崖壁掩映飛瀑互濺林  
巒蔽虧花宮對呈微波涓涓環流古礪歸樵得得覓路  
濃蔭起勢秀倩宜人於鷗波爲近蓋山樵乃承旨外孫  
固得畫法於趙氏末幅竒石倚伏若斷若續亦靈亦頑  
筆力恣肆欲上攀董巨尤妙在淩雜之中仍復理法秩  
然雖叔明復作當有冰寒青勝之喻矣引首黃鶴傳燈  
四字爲二瞻書後有遜之圓照二瞻三題並譽不容口



石谷自記謂斲輪妙手徒自望洋興歎何欲然歟石谷之虛懷三君子之服善若徒於藝人中求之毋乃失之遠甚

王耕烟寫吳元朗西齋圖卷

草堂中圖史積几二叟執卷對坐階下峭石嵌空坡陀厯亂雜植松桐柳竹之屬一鶴循行其間款署西齋圖丁丑清和朔虞山王翬畫別紙西溟跋東坡西齋詩及初白七絕四首又陸潤之烏絲闌書跋略謂元朗給諫取東坡詩意倩石谷爲圖余按圖固從西齋深且明中有六尺牀取義然吳氏亦自有西齋可稱舊唐書吳兢

傳兢家聚書頗多嘗部錄其卷第號吳氏西齋書曰是也觀圖中經籍錄略充牣几席恐給諫當時未嘗不用兢故事故禹慎齋鴻臚作此圖亦寫圖書滿家一翁徙倚竹間也又禹圖署款西齋圖三字用篆書太倉吳公命寫照補景師王晉卿烟江疊嶂圖筆意則用正書都門客胸廣陵禹之鼎寫又用隸書今與石谷卷並藏余家

耕烟江山無盡圖卷

石谷作此圖時參用溼筆尙有董巨遺矩故乍觀雲氣滃然迷離煙霧細辨則礬頭沙腳屋舍草木布置精工



點綴盡善甚而柳陰放牧棧道鈴馱呼牟鳴圖幾使聲  
落紙上山水至此神乎技矣後題五言詩并錄思翁語  
云董北苑僧巨然都以墨染雲氣有吞吐變滅之勢米  
氏父子宗董巨法稍刪其繁複獨畫雲仍用李將軍拘  
筆如伯駒伯驕輩欲自成一家不得隨人去取故也可  
見耕煙筆底融會北宋名家處處是法故雖講氣韻渾  
厚而出以精鍊自能於元賢外別樹幟識梅村祭酒觀  
石谷山水圖歌云頓挫淋漓寫胸臆研精豪髮摹宗工  
非駿公深於畫學烏能抉其心事也哉

王石谷臨黃大癡富春山圖卷

墨井題跋有臨黃大癡富春山圖燼餘本詳見書畫壯  
觀錄爲宜興孝廉吳問卿臨終燒毀截去數尺此爲石  
谷子臨本氣韻位置直欲亂真卷後摹大癡題記云至  
正七年僕歸富春山居無用師偕往暇日於南樓援筆  
寫成此卷興之所至不覺疊疊布置如許逐旋填劄閱  
三四載未得完備蓋因留在山中而雲游在外故爾今  
時取回行李中早晚得暇當爲著筆云云末署十年青  
龍在庚寅歎節前一日書於雲間夏氏知止堂然則是  
圖訪落於丁亥至庚寅尙未觀成矣知止堂者六研齋  
三筆云雲間夏世澤所居趙魏公書扁是也此後復有



沈石田文壽承王百穀周公瑕鄒衣白董香光諸題跋  
別紙及隔水綾上一一摹出實則問卿時原題至衣白  
而止香光丙申冬所得者迺富春大嶺圖見容臺集題  
跋非此卷也否則豈有此卷國變後尙在問卿富春軒  
中而萬厯二十四年已歸香光之理問卿者湖海樓雜  
集感舊絕句有吳孝廉問卿注云孝廉名洪裕余姑夫  
也甫成童卽登丁卯賢書城中別墅曰雲起樓極亭臺  
池沼之勝面水架一小軒藏元人黃子久富春圖於內  
鄒臣虎先生顏曰富春軒知問卿爲天啟七年孝廉富  
春軒卽衣白所題又增畫苑故實矣至石谷自跋在大

癡後云大癡眞蹟流傳日少此卷行筆布置皆從董巨風韻中來荒寒簡率妙得象外之趣壬午秋山窗閑寂適有佳紙心摹手追殊有所得因記之壬午爲康熙四十二年石谷富春山圖尙有壬寅長夏避暑修古堂臨本見吳芝眞蹟題跋錄前此四十一年年三十一此則年七十一矣晚歲老筆神與古會大癡墨妙存否不可知得此臨本足爲畫家續命湯返生香焉

王石谷水竹幽居圖卷

余見石谷卷軸先後以百十計其全用宋賢意法不糅以元明及本家筆致若是卷之純粹以精者殆不數覲



款題壬子八月余過毘陵江上篴先生亦至同客楊先生竹深齋縱論古今旁及筆墨正叔惲子時來參語用宋人意畫水竹幽居圖先生悅之因以相贈云云是歲石谷年四十一正其法古人妙時也在辛有畫篴畫筌行世據畫徵錄篴重光一則惲王與江上確爲談藝密友往以夸示老友潘季玉季玉亦出所藏石谷仿天游雲西二段卷相抗審視江上跋知爲同時作兩卷外尙有雲谿高逸迂翁逸趣秋圃漁莊諸圖正叔題識殆徧又爲正叔成二圖蕭疏閒澹謂其爲他人作畫不肯出此投贈之雅賞識之眞測交伊始可志也此圖遙嶺幾

疊下環平坡垂楊兩株側  
媵新柳谿流猶芬花迎葦岸  
釣竹未餌童行版橋已覺  
靜氣迎人躁心都息乃渭水  
千畝雜萌胸中瀟湘數筠驚  
茁腕下翠浪疑響六逸之  
谿歟碧鮮成行七賢之林歟  
而背谿面林則竹中高士  
之茅堂在焉一渲一染尤近  
龍眠白描遺意本幅有南  
田七絕七首且謂有文湖州  
簞簞偃竹妙境珍重可想  
阮文達及吳愉庭並有題詠  
阮詩二首吳則用惲韻七  
首咸詫爲惲王合璧中無上  
妙品石谷款識仞爲南田  
代署眾賢相處之歡雅令人  
神往不置

王石谷十萬圖冊



石谷子爲巢寄齋司寇作十萬圖與石渠隨筆所記  
內府儲藏本異按隨筆王翬十萬圖有萬山雲起萬樹  
秋聲萬里晴光此冊作萬笏朝天萬丈空流萬林秋色  
異一隨筆載自識云昔倪高士嘗爲陶南村作畫冊十  
種皆以萬爲名商邱侯朝宗作文記之此則云昔倪高  
士爲陶南村作畫冊十種皆以萬爲名如首幀卽萬笏  
朝天後幅萬峰飛雪題曰十萬圖舊藏陽羨陳少保家  
商邱侯朝宗作文記之今此冊已入長安無從賞其筆  
墨云云異二隨筆於萬卷書樓萬橫香雪幅皆憚壽平  
題此作白萬笏朝天以下皆陳香泉對題異三蓋石谷

此圖總名子曰皆仍雲林觀壯悔堂集倪雲林十萬圖  
記所謂萬笏朝天萬丈空流萬林秋色諸名皆與此符  
合而所謂舊藏陽羨陳少保家者又與記中定道人出  
此圖相示道人名貞慧明少保陳公子庭之子合蓋記  
無不真者也至作圖歲月雲林款署至正癸丑石谷款  
署康熙癸未先後相去三百三十二年云

王耕烟爲東海司寇摹古山水冊

冊都二十幀每幀旁簽所摹姓名得關全徽宗閻次平  
王晉卿夏禹玉李成高克明董北苑范中立劉松年蕭  
照郭熙李晞古趙大年趙承旨王叔明黃大癡王右丞



十八家山川城郭廬舍舟車皆縮至分寸樹如薺人如  
豆水墨設色家法儼然具有芥納須彌粟寄滄海道力  
自跋云規撫唐宋元諸家二十幅余甲寅歲游鹿城爲  
東海司寇公作今已四十餘年矣憶壯歲奔走四方快  
睹昔人名蹟心目貫浹夢寐不忘因放筆爲此媿未得  
其神髓惟是諸幅中各出面目不相蹈襲如杜陵所云  
眾人貴苟得欲語羞雷同則庶幾矣衰年腕鈍故吾盡  
失觀河鰖面不禁憮然時康熙甲午小春旣望耕烟散  
人王翬重觀於水雲精舍時年八十有三上有甲寅九  
秋西廬八十三叟王時敏識云近從鹿城舟次得快觀

巨冊摹古共二十幀筆端變化於前詰神韻各極其致  
迴環展玩如探海藏如羅寶網不覺目眩魂搖但惜先  
有所歸弗獲乞爲家祕朝夕坐臥其間殊不勝悵惘耳  
蓋是冊爲徐健菴司寇作今懽園集有送王石谷之秣  
陵謁周櫟園使君云虞仲祠前三徑紆聞君蹤跡慣江  
湖相逢第二泉邊路萬樹秋晴入畫圖自注石谷摹宣  
和江渚秋晴卷甚精又云祇今粉本許誰工老輩婁江  
二妙同聞道比來都閣筆說君真過石田翁自注王奉  
常謂石谷畫品在沈石田上冊當作於其時故司寇傾  
倒如此也



惲題王石谷山水十二幅冊

是冊視爲徐司寇作尺寸稍大且彼多設色此多水墨合之兩美可謂雙璧每幅自題有曰天游生觀瀑圖余用其法略芟繁縟歸於簡遠曰盧鴻草堂唐人名迹余從吳閶借撫復見思翁臨本因倣其意曰謝雪村霜林茅屋曰文徵仲倣李成寒林激澗曰楓湫雲頂趙善長師北苑法曰複岫百重迴溪千轉臨江貫道曰梧竹清陰倣雲林生曰郭恕先待渡圖曰燕文貴武夷山卷曾於白門得觀因撮其大意曰水村圖臨趙文敏曰徐幼文溪山琴趣圖臨於玉峰客館曰楓崖澹秋氣松磴冷

泉聲黃鶴山人法草木蓊鬱巖壑深秀其鈎勒處筆如  
鐵絲尤徵士氣間有南田題語如云峭蒨煙苔路欲迷  
陰厓茆屋隱芳溪荻花風過秋聲起坐看紅林到日西  
三十年留心繪事不知元時玉峰有謝雪村石谷子偶  
從白門見之亟爲歎賞此景點秋山紅樹荒率有逸氣  
卽用雪村遺意爲之又云唐以前無寒林自李營丘范  
華原始盡其法雖虬枝鹿角槎枿紛拏而挈裘振領條  
理具在又云秋氣生几席冷然神襟靜墨池游天吳山  
靈呼未醒夾澗青楓高風潭翠微冷宿雲停半嶺村路  
入谷冥時從雲影中忽露青厓頂又云一痕烟岫影模



糊碧雨淋漓點竹梧千古墨林稱逸品米顛以後只倪  
迂梧竹松石布置只數點墨耳冷然有塵外趣所以迂  
翁獨擅千古又云點點沙鷗下渚田荒荒漁舍隱溪烟  
夕陽柳岸收魚網秋水蘆花放鴨船觀石谷水村樵本  
煥然神明不止下真蹟一等又云山亭空翠碧溪深靈  
氣能生靜者心嵐雨松風何處聽秋聲不斷在絃琴幼  
文筆致秀聳有逸趣在雲西丹丘之間石谷擬議神明  
直是後來居上詩跋皆與畫發明足補蔣生沐甌香館  
輯本之遺因備錄之謝雪村卽謝庭芝字仲和平江崑  
山人善墨竹見圖繪寶鑑又匏翁家藏集有爲楊起同

題沈田石擬謝雪村山水詩

王石谷臨董北苑萬壑松風圖軸

尋丈巨障寫盤陀三五長松六七鳴泉潐沸趨壑爭流  
有古衣冠人撫絃動操殆歌石瀨淺淺飛龍翩翩之曲  
歟仰視百丈山頭瀑布倒懸白雲沍之老屋叢樹皆在  
迷離杳靄間飯顆生所謂元氣淋漓障猶溼也款題董  
北苑萬壑松風圖乙酉暮春臨於西爽閣又云戴安道  
云巖岫高則雲霞之氣鮮林藪深則琴筑之音清味二  
語可謂得山林之神矣與景適符故書之按乙酉爲康  
熙四十三年先生七十四矣猶氣骨沈雄魄力渾厚如



是宜周櫟園讀畫錄中稱爲百年以來第一人也

王耕烟仿叔明山館午參圖軸

雲峰萬點晴翠百重時於松光樹影間微露竹窗茆屋  
坡上一翁戴笠拄杖臨流小立題云老來自覺筆頭迂  
寫畫如同寫隸書黃鶴一聲山館靜道人正是午參餘  
丙寅春正是年五十五歲畫作解索皴網巾水極縣密  
作也

王石谷臨江貫道谿山無盡圖軸

墨筆作重岩複岫危坡絕澗槎枒古木擎空攬地林罅  
山背時見樓閣款署江貫道谿山無盡圖爲闔生社長

臨於鶴來堂時方壇坫盛行故凡同志率以社長稱之  
特闔生未知爲誰按谿山無盡當卽書畫舫所謂董玄  
宰買龔氏江貫道江山不盡圖也

王石谷仿黃鶴山樵寫山莊樂志圖軸

淺絳寫青芙萬朶晴翠欲滴山下草堂茆屋花徑蔬畦  
帶野環村頗得郊居之趣所謂良田廣宅背山臨流溝  
池環匝竹木周布也當檐霽處黃篋爲柵山翁持蒲葵  
扇坐南風中舉網得魚援繳射鳥漁獵歸者候問於戶  
外所謂濯清水追涼風釣游鯉弋高鴻也皆與後漢書  
仲長統傳合觀幅端隸書山莊樂志四字及辛亥十月



四日仿黃鶴山樵筆意乃孔翁七十生朝先生寫以持  
贈者此圖狀其歸老山林頤性田園博進一觴也余又  
藏樂志論圖長卷則仿雲林墨筆爲梅溪寫後有國  
初諸老楷書仲長統傳並題詠最爲精品往在武昌以  
贈莊衛生方伯衛生余嘗兄事者文學政事卓然可傳  
今日思之安所得是人耶


耕烟散人臨雲林畫軸

淡墨寫疊糕坡上有溪館臨流古木當門幽花出籬屋  
背山光渡水竹翠浮空清暉臨倪迂畫本也并錄原題  
云荆溪周隱士邀我畫溪山流水初無競歸雲意自閒

風花春爛熳，蘇雨石爛斑。書畫終爲友，輕舟數往還。至  
正甲辰四月一日，爲伯昂寫此圖賦詩以贈倪瓚。按雲  
林詩集有贈周校書云：參天竹樹存貞碧，動地波瀾任  
往還。輸與荆溪周處士，避人探道掩松關。與詩畫適合  
知校書當字伯昂矣。甲辰至正二十四年也。白書款署  
康熙歲次戊寅四月一日，摹迂翁筆贈蘅圃先生蘅圃  
爲龔翔麟卽玉玲瓏閣主人。復有王儼山絕句：姜西溟  
題記嘗謂是畫具有三奇石，谷石法悉變平時面目一  
也。雖宗法宋元大家而於迂翁稍異。此幀蕭遠簡澹，居  
然嬾瓚二也。原本臨本先後俱在四月一日三也。特爲



拈出以志墨緣





右過雲樓書畫記十卷余與三子承所手定者也揚雄  
草元許與童烏范甯解經附傳泰雍小道可觀竊比此  
例慚余爽德垂老喪明壬午以後抱恨絕筆念其精思  
所冥會品彙萬象抗心以遐希揖讓千古觀卷未竟筆  
識王詵携軸就鑒人師郭熙每當呼子之頃輒有起子  
之歎今茲篋衍尙存厓略不忍捐棄以授諸孫異日吳  
分望氣上徹牛斗江介揚靈中亘虹月世有好事僂指  
吾樓則是箸尙非詒癡也嗚呼博士失官寶章無錄雲  
烟過眼視此陳編良盍居士

蘇州閶門內鐵  
瓶巷本宅刊行



哭三子承詩四十首 附

平生不抱譽兒癖衰老偏吟哭子詩一字吟成一滴淚

龍鍾雙袖少乾時承初名廷烈後改今名字承之號駿叔又號樂全浦夫人第三子也

童時書法習師門愛畫由來負夙根翁范沈程諸老輩

忘年小友其評論承幼慧偕長兄廷薰次兄廷熙從塾師徐江帆先生游先生素工書其時

翁小海范引泉沈竹賓程序伯諸君皆以畫名與江帆交好往來塾中承聆其緒論信手塗抹具有夙慧諸先

生皆愛之引爲小友

生來翰墨有前緣羣笑癡猷兩少年積累幾多投撲滿

已知津貼畫叉錢與次子熙幼即同好書畫遇有小品私出所蓄餅餌錢購之

弟兄難共侍庭闈楚北年年鴈代飛豈料皇乾猶降酷

斗看如雪換麻衣

咸豐五年余以知府發往湖北時先考春秋已高留全家侍奉以一子

自隨一年為期兄弟瓜代八年承來代

十年三月得家書驚悉先考棄養

亟治行裝歸去來忽聞麋鹿走蘇臺江鄉黃葉家何在

四月蘇城失守無家可歸父子歔歔相對日坐愁城

空倚南樓詠八哀

新堤舟次得家書隔斷南雲已歲餘父子相持同慟絕

妻孥凋謝故鄉墟十一年春賊竄黃州余挈承避兵新

屬之朱埂廷薰廷熙暨亡室相繼

枯槎直下大江東順水偏教阻逆風別賃小舟牽百丈

千鈞一髮轉飄蓬

鄂省肅清買舟東下阻風二十餘日始抵漢口

行李還鄉止一肩漢陽同上火輪船蓬窗浪入無乾處



露宿空艙擁背眠

舊僕星散止僱一僕照料行李搭坐輪船赴上海中途浪激入窗襪被盡

溼父子露宿艙面

一舸移家返故都菊殘松老小園蕪慈烏營就巢安穩

累汝脩脩尾畢逋

同治三年八月全家遷回省城鐵瓶巷舊宅

風雨先靈泣夜臺傷心宰樹伐條松楸鬱鬱青如舊

是汝衝寒塚手栽

是冬令承修理下沙塘祖塋樹木被賊伐盡一律補種迄今已復舊觀

巾箱舊業未拋荒得列黌門弟子行一領青衿差自慰

要傳古硯繼書香

七年四月承入元和庠

風引閒雲復出山料量家計汝能嫻胥江春水鱗鱗綠

送我登舟別淚潛

余初因先考不逮祿養無復宦情嗣經親友勸駕乃變計出山九年三

月入京  
候簡

西冷新結鷺鷥盟攬勝藍輿得得行要與青山同不朽

飛來峰下各題名

十二年八月赴省提調鄉試承來省侍游西湖諸勝在飛來洞刻石題名

年近懸車願息肩汝能仰體勸歸田如何大好林泉趣  
不及相依到十年

鄰居新拓屋東頭預築幽棲待息游手闢高低兩重屋

艮菴相對過雲樓

愚公手采玉芙蓉移作屏山翠幾重五岳陡然方寸起

不容星宿更羅胸

艮菴之南軒庭列五峯署曰五岳起方寸

祠堂記汝築登登春祭躋堂共拜興豈料再逢秋祭日



汝偏先我侍高曾

憑空結構此園林世俗塵無一點侵別寫胸中邱壑趣

蕭疎如畫澹如琴

宅後尚書里購得廢址十餘畝先構石種樹蒔花樓閣亭榭參錯其間皆承手創工已過半余歸後復與互相斟酌全局完好名曰怡園在余爲自

怡在承爲怡親也

艮嶽奇疆到處探萬牛輦致百夫擔題評甲乙平泉例

寒碧獅林鼎足三

吳郡自經兵燹廢園奇石多湮沒於荒烟蔓草中披榛剔蘚而致之故怡園之石幾與獅子林寒碧莊爭勝

落星墳指石湖濱祭掃年年薦藻蘋古柏蒼松防剪伐

綠陰濃護石麒麟

詩

三

承必邀同姓數人往祭  
封植修衛不靳貲力

沿路東風吹紙錢攜琴載酒上墳船瓣香供奉王摩詰

寒食梨花拜墓田

琴師王石香墓在天平山  
每年清明必約同門祭掃

媚鄉遙指采香涇一櫂純波渡洞庭七十二峰游不了

石公山下片帆停

性愛山水莫釐縹緲鄧尉天  
平靈巖虎邱諸勝游屐常經

築屋藏琴寶大蘇峩冠博帶像新摹一僮手捧焦桐侍

窠臼全翻笠屐圖

園中築坡仙琴館藏公手  
製玉澗流泉琴并圖公像

久將輕薄笑相如別有琴心悟靜虛展到縹緲和淚讀

各家詩畫各家書

繪悟到琴心  
圖冊徵詩

不須折柬約高朋隨意盤殮野簌登儘有雜賓無俗客



書癡畫隱與琴僧

圖書藏弃過雲樓筆記編成付校讐他日梓成見何及

空餘卷尾姓名留

余著過雲樓書畫記十卷屬其校勘甫脫稿尚未梓行

夙宗柳骨與顏筋寫徧求書白練裙近日揮毫尤灑脫

服膺貞愍故將軍

書從顏魯公入手近喜學湯貞愍

雲烟變滅雨空濛元氣淋漓水墨中獨得畫禪三昧訣

米家父子董思翁

畫近濫各家尤喜摹小米思翁水墨一種

評量古帖靜凝神唐宋元明辨逼真紙色墨光精攷校

了然如見搨碑人

鐘鼎槃匱爵觚臚陳清閤仿倪迂手摹搨本縣齋壁

不數宣和博古圖

璽愛周秦章愛漢旁搜印記到泥封陳壽卿吳退樓南

北爭雄長界汝區區作附庸

布貨錢刀夙所耽蒐羅纂入畫餘盒精摹形制詳稽攷

典雅差堪繼癖談性愛骨董別有神悟物之真偽一見即決百不失一因余素嗜書畫自唐

宋元明迄於國朝諸名蹟力所能致者靡不蒐羅旁及金石如鐘鼎尊彝古錢古印之類亦皆精究著有坡

仙琴館隨筆五編畫餘盒印譜錢譜若干卷

士衡鐵筆妙通神名蹟雙鈎欲奪真一代過雲樓集帖

隋珠和璧數家珍擇家藏名蹟倩海鹽陸芝山茂才精摹刻石為過雲樓帖八卷

五十知非企衛遽因之自訟繪成圖不期此畫符妖讖



三影分明幻化軀

常熟范秉之蕭山任阜長合繪自訟圖小景

一生強半病中過飯顆常年嗽不多直到長眠眠始穩

可憐夢已醒南柯

十四五歲時得便血之症終其身未脫體午餐不過半孟夕寐不過兩時

神仙尸解佛毘盧骨肉原無不壞軀此理自明心自昧  
沈迷癡愛愧凡夫

達觀妄冀悟無生淚眼雖枯未喪明怕汝九泉腸亦斷  
憑棺嗚咽不成聲

常日周旋笑語陪依依膝下尙如孩偶聞履響頻驚顧  
疑汝寢門定省來

一棺送汝到山邱生壙前年幸早留他日黃泉好相見

言  
松楸只尺我菟裘

虔誦金經懺宿愆蒲團靜對一爐烟可能仰仗慈悲力

挈汝同登大願船

光緒八年壬午仲秋良盦老人



2617356 H49 5/6

光緒八年壬午仲秋  
日愈老人







